

An c'a'al u axi thuchanchat an ebchalabchic ti Corinto c'al an t'ocat abathuale Pablo

A Pablo in thuchanchal an u an tamcunel ebchalab ti Corinto

1 Nana'its im Pablo tin abathualejil a Jesucristo, cum pel in culbetal a Dios antsana' tiquim bijiy. Nana' ani u ebchal c'al a Cristo Sóstenes tu tsapnethalchic. **2** Nan tu thuchanchal axe' xi u ax it c'uajatchic ti bichou Corinto ti al an tamcunel ebchalab ani patal jitats im palenchal im bij i Ajatic Jesucristo, cum pelits i Ajatic c'al patal huahua' tu belom. Tata'chic pel ti c'al a Dios ani it t'oquethanchithits a ichich cum it ts'at'bath c'al a Cristo Jesús. A Dios ti tacuyamalits abal antsana' ca co'oy a ichich t'oquethanchithits. **3** U lej le' abal i Tata Dios ani i Ajatic Jesucristo ti lubach co'onchichic a ichich c'al in alhua' inictal ani jaye ti jun ejetbethanchi a ichich.

A Pablo im binal i c'ac'namal yan c'al a Dios

4 Ets'ey u binal i c'ac'namal yan c'al a Dios tam cu t'ilá' abal

jaja' tin ebal in alhua' inictal ti lej lablinchamalits cum it ts'at'bathchic c'al a Cristo Jesús. **5** Jats tit labenec c'al patal jahuaquits tam lablinchixtalab. A Dios ti pithamalits i huit'omtalab ca tequeth ejtinchi ani ca lej huilchi in cahuinal. **6** Lej chubax it lej t'aychithits ta ichich jahua' nan tu olchamalits tin cuenta a Cristo. **7** Ni jant'o tam huit'omtalab yab a q'uibchalchic. Jats ca lej eyentha'chic biyat a aychal ma quim baju a q'uiucha ca chich junil i Ajatic Jesucristo. **8** Jaja' ne'ets ti tsapliliy chic abal ca junini' aynanchi im belil ma tam ta ca huichiy junil, ani yab ne'ets quit elchin jant'o ti quit jolbiyat. **9** A Dios ets'ey im putuhual c'al in cahuinal, ani ja'its jaja' ax ti tacuyamalits abal ca co'oy i t'ilomtalab c'al in Tsacamil Jesucristo axi pel i Ajatic.

An lehuaxtalab

10 C'al im bij i Ajatic Jesucristo nan tu lej uchal ebchalabchic, quit c'uajlelen jun ejet ani yab quit lehuáxin. Ca t'ayat co'oy a tsalap

jununul. ¹¹Antsana' tu uchal ebchalabchic, cum in olchinene c'al axi c'uajatchic tin q'uima' a Cloé abal it lehuáxchic. ¹²Hua'ats i ebchalabchic in ulal abal pel i ts'at'el c'al a Pablo, ani hua'ats in ulal pel i ts'at'el c'al a Apolos. Hua'ats axi pel i ts'at'el c'al a Pedro ani hua'ats axi pel i ts'at'el c'al a Cristocua'. ¹³Auxe' max in tomnal ax im belal a Cristo ca c'uajiy lehuohuolchic. Iba. Auxe' max nana' im Pablo tin tsemets al an cruz tin calchix c'al tata'chic. Iba. Auxe' max tata'chic it pujnenec abal tiquin ts'at'enchi. Iba. ¹⁴Lej c'ac'namal yan a Dios abal expith u pujay a Crispo ani a Gayo axi c'uajat c'al tata'chic. ¹⁵Ni jita' yab in ejtohual quin ulu abal max nana' u pujayamal i inicchic abal tiquin ts'at'enchi. ¹⁶Ojni' u pujay jaye axi c'uajatchic tin q'uima' a Estéfanas, ani yab u t'ilal max q'ue'at jita' u pujayamal. ¹⁷Tin aba' a Cristo cu olna' an alhua' cau ani yab quim pujlats. Yab u olnal c'al u cuete' tsalpath cahuintal, i ca muctsins in tsap an alhua' cau jant'ini' ti tsemets a Cristo ti Jec'onthax ti al an cruz.

In tsap ani in tsalpathtal a Dios

¹⁸Qui olchi i q'ubeneç inicchic abal tsemets a Cristo ti Jec'onthax c'al jaja' ti al an cruz, tocat in tsalpayal pel i tonto t'ilab. Qui olchichic axi jec'onthachits ani in tso'obits abal tats tu che'el in tsap a Dios ti Jec'onthax. ¹⁹In ulal a Dios ti al an T'ocat Thuchlab tin cuenta in cuete' tsalap an inic antse':

Ne'ets cu talabéthanchichic in tsalpath an tsalpath inicchic.

Ne'ets cu pojcanchichic in tsalap axi lej exoblat.

²⁰Hualam max jant'o in ey an tsalpath inic tin cuenta an jec'onthaxtalab. Hualam max in cua'al in exbath axi lej huit'om ti exobchix c'al an ts'ejcath cau binath c'al a Moisés. Hualam max jant'o ti tabat jita' lej huit'om quin t'iloxna' expith jant'o hua'ats teje' tsabal. Iba. Cum a Dios in tejhua'metha'its abal tonto jaja'chic tin cuenta an jec'onthaxtalab. ²¹A Dios yab in jila' an inicchic quim baju quin exla' a Dios c'al in cuete' tsalap. Pel in culbetal quin jec'ontha' patal jitats quim belchi abal a Cristo tsemets ti Jec'onthax ti al an cruz. Hua'ats i inicchic max ca olchin in tsemtal a Cristo, tocat in tsalpayal abal pel i tonto t'ilab.

²²An Israelchic tocat in lej le' ca t'ajchin i labith t'ajbilab ti tsu'bixtalab abal quim bela' a Dios. An griegochic tocat in lej ayal i tsalpathtalab. ²³Ani huahua' i olnal abal tsemets a Cristo ti Jec'onthax ti al an cruz. Pel i cau c'al tu t'apchinal in tsalap yab quim bela' an Israelchic, ani an griegochic in tsalpayal abal pel i tonto t'ilab. ²⁴Bel hua'ats i Israelchic ani i griegochic axi bijithits c'al a Dios abal ca jec'ontha. Tam ca olchinchic abal a Cristo tsemets ti Jec'onthax ti al an cruz, in ejtiyal abal c'al a Cristo tats tu che'el in tsap ani in tsalpathtal a Dios.

²⁵Jahua' u uxnal c'al i inicchic pel in tontotal a Dios, jats axi más c'athpich in exbath ani yab ejtil in cuete' tsalpathtal an inic. Jahua' u uxnal c'al an inicchic a Dios yab

in cua'al in tsap, jats más in lej cua'al in tsap ani yab ejtil in cuete' tsap an inic.²⁶ Ca t'aja' ti cuenta ebchalabchic, jant'o tam inic ax u bijiyabchic c'al a Dios ca jec'ontha. Yab yan tata'chic ax it ajith tit tsalpath c'al axi yab exlomthic c'al a Dios. Yab yan tata'chic ax it oc'lec ani yab yan ax it pulic a ey.²⁷ It uxnalchic c'al axi yab exlomthic c'al a Dios tit tonto ani tit bil. Bel aba ani' ti tacuyamalits tata'chic a Dios quit jec'ontha, ani antsana' tu tithebethab an tsalpath inic ani jaye ax in tsalpayalchic in lej cua'al in tsap.²⁸ Jita'chic u uxnal pel i alq'uith inic ani jita' u pojcab c'al axi yab exlomthic c'al a Dios, ja'its jaja'chic axi tacuyamejits c'al a Dios. A Dios in tacuyamalits ca jec'ontha jita'chic yab jant'o in ey, ani antsana' u jolatmethanchab in cuete' tsalpathtal tin cuenta an jec'onthaxtalab axi uxnal pulic in ey.²⁹ Jaxtam abal jay yab in ejtohual jita' quim puhuetha' tim ba' tin tamet a Dios.³⁰ Jats a Dios ax tu ts'at'bamatilts c'al a Cristo Jesús ani tu pithamalits qui eynanchi jaja' ti tsalpathtalab. Ja'its tin ebal jaja' abal a Dios tu ts'at'huahua' tu bolith. Jaye tu t'oquethanchal i ichich ani tu jec'onthal.³¹ Cum antsana' i eynanchal in ey an Ajatic, jaxtam in tomnal qui t'aja' jahua' in ulal an T'ocat Thuchlab antse': Jitats in le' ti puhuethanchix, quim puhuethanchi im bij an Ajatic.

In olnal a Pablo abal tsemets a Cristo ti al an cruz

2 Nan tu olchamalits an chubaxtalab ebchalabchic,

jant'o in t'ajamalits a Dios abal quin jec'ontha' an inicchic. Tam in c'ale tu olchichic yab u eyentha' i c'athat cau ni i c'athat tsalap.² U t'ayat tsalpayamalits expith cu olna' abal Jesucristo tsemets ti Jec'onthax ti al an cruz.³ Tam in c'ujajatac c'al tata'chic u ats'a' lej palulul u inictal, ani ma t'elelats u ichich cum u ts'ejna' max yab cu tala' putu c'al u uchbil tin olnom.⁴ Tam nan tu olnanchichic an alhua' cau yab u luba' tu quinchi a ichich c'al i cau axi expith u acninal tin tsalap i tsalpath inic, tocat ti quinchi a ichich an Espíritu Santo c'al in tsap a Dios.⁵ Antsana' ti t'ajchichic abal ca tsapnanchi in tsap a Dios ani ca lej belchi in cahuintal a Dios ani yab expith i cau ax u acninal tin tsalap i inic.

Tso'oblinchix an Espíritu Santo

6 Huahua' tu belom i olnal i cau axi hua'ats c'al jitats in jum putat belal a Dios c'al fatal in ichich. Yab ja ax u acninal tin cuete' tsalap an inic, ani c'al an oc'lechic ti al an hualab c'ay'lal yab hua'ats. Pel jaja'chic xe' axi thubat ne'ets ca taley.⁷ An cau ax i olnal pel in tsinat tsalap a Dios axi tsincanchat an inicchic ax ti jayq'ui', ani ma xohue' huahua' i olnal. Pel in tsalap a Dios ax in tsinat co'oy ma tam ti yabaye in ts'ejca' an eb ani an tsabal, abal ne'ets tucu jec'ontha' abal ets'ey.⁸ Yab tso'oblinchame nixe' xi tsalap ni jun i oc'lec ti al an hualab c'ay'lal. Max tso'oblinchamejac yab in tsemthamalac ti al an cruz an Ajatic axi expith in cua'al in lej

ts'atal. ⁹Antsana' tu putnal jahua' in ulal an T'ocat Thuchlab:

A Dios in t'ojojonchamalits yan
jant'o axi c'anithom c'al jaja'.
Ni jita' yabaye in tsu'chamal
ani ni jita' yabaye in
ats'anchamal.

Yabaye in tsalpanchamal i inic
jahua' t'ojojonchatits.

¹⁰Bel huahua' xo' i tso'obnalis
jahua' a Dios tu t'ojojonchamal,
cum an Espíritu Santo tu
tso'oblinchal. An Espíritu Santo
in tala' exlal patal, ma in luputh
tsalap a Dios.

¹¹Ni jita' tam inic in ejtohual quin
tso'obnanchi jant'o tam tsalap in
cua'al in at inic tin ichich, cum
expith an inic in tso'obits in cuete'
tsalap. Aniye jaye ni jita' tam
inic in ejtohual quin tso'obnanchi
jant'o tam tsalap in cua'al a Dios,
cum expith an Espíritu Santo in
tso'obnanchal in tsalap a Dios. ¹²A
Dios tu pithamalits an Espíritu
Santo abal tucu tolmiy qui ejtiy
jahua' a Dios tu pithamalits tin ebal
in alhua' inictal. Yab i ejtiyal c'al
i cuete' tsalap. ¹³C'al i cau ax tu
exobchal an Espíritu Santo i olnal
jahua' a Dios tu pithal. Yab pel i cau
ax i elamal ti cuete' oc'. Pel i cau
ax u olnab c'al an Espíritu Santo,
ani ja'its xe' ax i lamc'anchal an
inicthic axi c'ujchithits jaye c'al an
Espíritu Santo.

¹⁴An inic axi yab c'ujchith
c'al an Espíritu Santo yab im
bats'c'unchal an cau ax u olnab
c'al an Espíritu Santo, cum tocat in
tsalpanchal pel i tonto t'ilab. Yab in
ejtohual quin ejtinchi, cum expith
jitats ca tolmiyat c'al an Espíritu

Santo jats ne'ets quin ejtinchi. ¹⁵An
inic axi c'ujchith c'al an Espíritu
Santo ojni' jats in ejtohual quin
ejtinchi patal an cau ax u olnab
c'al an Espíritu Santo. Axi yab
c'ujchith c'al an Espíritu Santo yab
in ejtohual quin ejtinchi jahua' in
olnal axi c'ujchith c'al an Espíritu
Santo. ¹⁶In ulal an T'ocat Thuchlab:
Ni jita' tam inic yab hua'ats axi tin
cuetemtal in ejtinchal in tsalap
an Ajatic ani ni jita' tam inic
yab hua'ats ax in ejtohual quin
ts'alabchi a Dios. Aba ani' antsana'
ti thuchathits, bel huahua' xohue'
ax u c'ujchith c'al an Espíritu
Santo i eynanchal in tsalap a Cristo.

An at t'oijnalchic c'al a Dios

3 Tata'chic ojni' ebchalab, cum
yab it jum putat co'onchith
a ichich c'al an Espíritu Santo a
t'ajalechic ejtil axi yab c'ujchith
c'al an Espíritu Santo. Aba ani' it
ts'at'bathchic c'al a Cristo, bel ejtil
max it t'eleye, ani jaxtam in tomnal
nan tu tauna' ejtil max u taunal i
t'ele'. ²Nan tu exobchalchic i cau
axi yab q'uibat cum ejtil max it
t'eleychic a yejenchal tocat an
letsa ani iba an te'nel. Yabaye a
ejtohual ca exbaychic i cau axi
q'uibat. ³A t'ajalechic ejtil axi yab
c'ujchith c'al an Espíritu Santo.
It pa'ixnáx ani it hueutsíx ani it
lehuáx. Antsana' a t'ajal jant'ini'
jayetseq'ui in t'ajal an inicthic axi
yab c'ujchith c'al an Espíritu Santo.
⁴Hua'ats jita' c'al tata'chic in ulal
pel i ts'at'el c'al a Pablo ani hua'ats
ax in ulal pel i ts'at'el c'al a Apolos.
Ojni' a t'ajalchic ejtil axi yab
c'ujchith c'al an Espíritu Santo.

5 ¿Jant'o u ey nana' tim Pablo ani in ey jaye a Apolos? Expith pel tu t'ojnalchic huahua' c'al a Dios ani tu eyenthalamal a Dios tu tolmiythic tata' ca bela' an Ajatic. Expith i t'ajal jahua' a Dios tu punubchal qui t'aja'. ⁶Nan tu t'ojlabil ejtil max tu t'aychichic ta ichich in cahuintal a Dios, ani a Apolos ejtil max pel i huac'al c'al nixe' xi cau. Jats expith a Dios ax ti t'ajchichic abal ca labey in cahuintal ta ichich. ⁷Jaxtam an t'aychix ani an huac'al yab lej exbath in ey, expith a Dios in cua'al in lej ey cum ti t'ajchal abal ca labey in cahuintal ta ichich. ⁸Pel i at t'ojnal an t'aychix ani an huac'al, ani ne'ets quim bats'u ti junchic c'al a Dios in atohual jant'inits tim putumalits in t'ojlabil. ⁹Nana' ani a Apolos pel tu at t'ojnal c'al a Dios, ani tata'chic ejtil max it t'ayablab jun tin t'ojonchal a Dios.

Jaye ejtilchic max pel it ata ax u ts'ejcab c'al a Dios. ¹⁰Nana'its ejtil max pel tin thacum c'al i t'ujub atachic, cum antsana' pel u pithob tin ebal in alhua' inictal a Dios. Ejtil max nan tu mo'canchamalits in cub an ata ani tata'chic ejtil max it ts'ejcom c'al tim puhuel an ata. Ca lej t'aja'chic ti cuenta ca alhua' ts'ejca'. ¹¹It mo'canchatits an cublab c'al an ata. Hua'ats juncats, ja'its a Jesucristo. Ni jita' tam inic in ejtohual quin mo'ca' pil i cublab ata. ¹²Ejtil max tata'chic a ts'ejal tim puhuel an ata eblim al an cublab ata. Hualam ca eyentha'chic i oro, i plata, i jalbith t'ujub. Hualam ca eyentha' i te', i tom, i jau' pacab. ¹³Ne'ets quim baju a q'uicha tam a Dios quin

ts'ejca' an inicchic, ani ma tamits ne'ets ca tajax tejhua'metha max alhua' o yab alhua' in ts'ejcabil an inicchic. A Dios ne'ets quin tacchi in ts'ejcabil ti junchic an inicchic c'al i tacaxtalab c'amal. ¹⁴Max in ts'ejcabil quin cuxuy an c'amal ne'ets ca pithan an inic in atohual. ¹⁵Max ca t'a'iy ni jant'o yab ne'ets ca pithan. Bel ne'ets ca jec'ontha nixe' xi inic axi t'a'inec in ts'ejcabil, ejtil max pama'tal ca caltha al i t'a'lam ata.

¹⁶Hualam yab a tso'obchic abal a inictal ejtil in tiyopanil a Dios jun tu c'uajil an Espíritu Santo. ¹⁷Jitats quin othnanchi in tiyopanil a Dios, jats ne'ets ca talabatha c'al a Dios. Lej t'ocat in tiyopanil a Dios, ani tata'chic ejtil max pel ti tiyopanil.

¹⁸Yab ca jila' a cuete' ichich ti c'ambiy. Hualam a tsalpayalchic abal it lej tsalpath c'al jahua' teje' tsabal. In tomnal ca t'aja' ejtil max yab it tsalpath, abal a Dios ti pitha' an tsalpathtalab axi lej chubax. ¹⁹A Dios in tsu'chal in cuete' tsalpathtal an inic lej tonto. In ulal an T'ocat Thuchlab: A Dios in jilal an inicchic ca macla c'al in cuete' tsalpathtal.

²⁰Jaye in ulal an T'ocat Thuchlab: A Dios in tso'obits abal jolat in cuete' tsalpathtal an tsalpath inic.

²¹Jaxtam yab in tomnal jita' quin c'athatna' tim ba' max expith ts'at'at c'al i inic axi tsalpath c'al jahua' teje' tsabal. C'al a Dios jats tit pithnenequitschic patal. ²²Nana' im Pablo pel tin c'al tata'chic jant'ini' a Apolos ani a Pedro abal tata'chic tucu tabatna'. Patal jahua' hua'ats ti tsabal ani ti eb, an ejattalab ani an tsemla, jahua' hua'ats

xohue' ani jahua' ne'ets ca hua'tsin talbel, patal pel a c'alchic abal ca tabatna'chic.²³ Ani tata'chic pel ti c'al a Cristo ani a Cristo pel in c'al a Dios.

In t'ojojabil in abathualejilchic a Dios

4 U le' abal tata'chic ca tso'obna' abal huahua' tu abathuale pel tu t'ojojalil a Cristo, ani u punuth qui huat'banchi an inicchic an cau axi tsincanchame ti jayq'u'i' ani xo' u olnanchab.² Pel in uchbil an t'ojojal quin t'aja' expith jahuats ta ca uchbiyat c'al in amu.³ Nana' tin t'ojojalil a Cristo yab u t'ajal ti cuenta max tata'chic tiquin tsalpanchi alhua' u t'ojojabil o yab alhua'. Tiquin tsalpanchi an inicchic jant'initis quin le'na'. Ma nana' yab u ejtohual cu cuete' ulu max in alhua' t'ojojal o max yab in alhua' t'ojojal.⁴ Aba ani' u ats'al tu ichich u putuhual c'al u t'ojojabil, bel hualam max chubax jum putat alhua' u t'ojojabil. Expith an Ajatic jats in ejtohual tiquin tsalpanchi max pel in alhua' t'ojojal o max yab in alhua' t'ojojal.⁵ Jaxtam tata'chic yab tiquin q'uejab tsalpanchi max in alhua' t'ojojal c'al an Ajatic o iba. Ca aychiye ma ta ca chich an Ajatic jaja' tucu olnanchi i t'ojojabil axi xo' yab i tajax exlal max chubax alhua' o yab lej chubax alhua'. An Ajatic ne'ets tucu tejhua'methanchi i tsalap ma tin luputh i ichich axi xo' yab u tajax exlanchab c'al an inicchic, ani tamna'its huahua' ti junchic ne'ets cu olna tu alhua' t'ojojal c'al a Dios ma ju'tamits huichat alhua' i t'ajamal.

6 Ebchalabchic, c'al nixe' xi cau nan tu hue' t'iloxnanchamal u

t'ojojabil nana' ani c'al a Apolos. Ca tso'obna' abal expith i junax exobchal jahua' thuchath tin cahuintal a Dios ani yab i jalunchal. Jaxtam yab ca c'athpich puhuetha' jun i exobchix ani junaque ca pojca'.⁷ Tata'chic ojni' it poc'oth tsu'ux jun c'al xi jun. Jats a Dios ax ti pithamal a ey ani patal jahua' a cua'al. Jaxtam yab in tomnal ca c'athatna' a ey ani jahua' a cua'al ejtil max a cuete' atamal.

8 Auxe' max chubax yabats a q'uibchale jant'o tin cuenta a ejattalcua'. A c'athpich tsalpayalits ejtil max it ts'alechic ani huahua' tu ou tsu'tal. U le'ac max chubaxac a bajumalits tit ts'alechic, tam huahua'hue i bajumalaquits tu junax ts'aile.⁹ Ejtil max huahua' tu abathualechic a Dios tu bijiyamalits cu ajiyat ti mas tsa'at i ey. Ejtil max u lej jolbithits ani u bijithits ne'ets cu tsemtha, ani tocat u telnal c'al tim patal an inicchic ani ma c'al an ángelchic jaye.¹⁰ U tsu'tabac huahua' tu lej tonto cum u lej t'ayat ts'at'at c'al a Cristo, ani tata'chic ojni' it tsu'tab tit tsalpath aba ani' expith it hue' ts'at'atq'u'i c'al a Cristo. U tsalpanchab huahua' tu palulul, ani tata'chic ojni' it tsapnel. U pojcab huahua', ani tata'chic ojni' it c'ac'nab.¹¹ Huahua' tu abathualejil a Cristo u xe'ets c'al i jayil ani c'al i chiquenib. U c'ot'ith ani yab i cua'al i q'uima'. Tu othnal an inicchic.¹² C'al i lej tsequeltalab i t'ojoonthal i c'ubac abal qui ata' an tumin. Max an inicchic tucu quithab ucha', tocat i conchal a Dios quin lablinchi. I cuuxyal an othnaxtalab.¹³ Max jita'

tucu quithab cahuiliy, tocat i lubal qui co'oy i ja'ublomtalab. U tsu'tab huahua' tu amul ani ejtil max jant'o tu c'atselom. Tu at'al an inicchic. Ma xohue'its antsana' i huat'al.

14 Nan antsana' tu

thuchanchalchic an cau abal tu ts'alabchi ani yab abal tu tithebetha'. Tu ts'alabchalconchic ejtil i tatalab in ts'alabchal in lej c'an tsacamil. **15** Aba ma hua'atsac lajuij i mil jita'chic ti exobchalac tin cuenta a Cristo, juncats a tata tin cuenta a ejattal. Cum nan tu olnanchichic an alhua' cau ani a bela' a Cristo Jesús, jaxtam ejtil max nana'its pel tin tata tata'chic. **16** Jaxtam nan tu lej uluth uchalchic ca ayna' a Cristo jant'ini' nana' u aynal. **17** Ne'ets cu aba' a Timoteo abal ti tolminchichic tin cuenta a ejattal. Ne'ets ti t'iloxnanchichic u xe'tsintal c'al a Cristo ani an chubaxtalab ax u exobchal tim patal an tamcunel ebchalab. U c'anithal a Timoteo ejtil max pel u lej pututh tsacamil, cum ja'its nana' ax u olnanchi im bij an Ajatic. **18** Hua'ats talchic c'al tata'chic lej c'athatma', in tsalpayal abal nan in jiq'uel ani hualam yab ne'ets cu luba' quin c'ale tu tauna'chic. **19** Huay ne'ets quin thubat c'ale max pel in culbetai an Ajatic. Tam ojni' ne'ets cu tso'obna' ax in t'ajal c'athat max chubax in tsapnal a Dios o expith u cauq'ui. **20** Jitats ts'ejcathits abal ca otsits ti eb jun tin t'ajal a Dios ti lej Ts'ale, jats ax in chubax tsapnal a Dios ani yab expith u cauq'ui. **21** Tata' ca tsalpaychic jahua' a culbetnal más. Max yab quit jic'tsonchic c'al a

hualab ne'ets quin c'ale ti t'ajchi jant'o ca yajchicna', ani max quit jic'tsonits ne'ets quin ulits c'al i c'anithomtalab ani c'al i c'aya'talab tu ichich.

An hualabtalab ti al an tamcunel ebchalab

5 Tso'obnathits abal jun jita' c'al tata'chic juncunenequits c'al in mimle'. Pel i hualabtalab lej pulic, ma yab in lej t'ajal antsana' axi yab exlomchic c'al a Dios. **2** Aba ani' antsana', bel a tsalpayalchic abal it lej alhua'. Expith in tomnal quit lej t'epin c'al nixe' xi lej hualbinel ani ca t'ajat quethmay. **3** Aba ani' yab in c'uajat c'al tata'chic tihua', bel u ichich c'uajat c'al tata'chic. U jolbiyamalits nixe' xi inic ejtil max in c'uajatac c'al tata'chic. **4** Ca tamcuy an ebchalabchic ani ca ts'ejca' an cau c'al jaja' tim bij i Ajatic Jesucristo. C'al jaja' in tsap ne'ets ti tolminchi ca ts'ejca'chic, ani u ichich ne'ets ca c'uajiy c'al tata'chic ti tolmix. **5** Ca bina tin c'ubac a Satanás abal ca yajchiquiyat ani yabats quin t'aja' jahua' in le' in hualbith ey, ani antsana' ca jec'ontha tam ca chich an Ajatic Jesús.

6 Tata'chic ojni' yab in tomnal ca tsalpay tit lej alhua'. Hualam yab a t'ilalchic jahua' uxnal antse', ca xalu hue' i jiliy c'oye c'al xi it ani ne'ets ca tala' jiliybe tim patal an it c'oye. **7** Ca jolou eleb nixe' xi inic axi ejtil i jiliy c'oye ani tata'chic quit jilc'on ejtil i pan axi ts'ejcath c'al i it c'oye, ejtil am pan ax u c'apab c'al an Israelchic tam tin t'ajal an ajib tin cuenta

abal calthame ti Egipto im biyal juntalchic. Jant'ini' tu tsemthab i cordero tin cuenta nixe' xi ajib c'al an Israelchic, antsana' ti tsemthame a Cristo abal tucu paculanchi i hualab, ani jaxtam tu bijiyab a Cristo ti Cordero. ⁸Max i t'ajal quithab ani pojcax i ey, ejtil max pel tu jiliy c'oye. Max i t'ajal jahua' in ulal an chubaxtalab ani max qui t'aja' tequeth, tam ejtil max pel tu pan ts'ejcath c'al i it c'oye.

⁹Nan tu thuchamalits al junaque i u abal yab quit juncunchic c'al ax in le' ti uxumbe ani ti inicbe. ¹⁰Yab u ulu max quit jum putat tixc'anchic c'al axi yab exlomchic c'al a Dios, cum expith ma tam quit tsemetsits, tamna'its ojni' ne'ets quit jum putat tixc'an c'al jaja'chic. Hua'ats al an hualab c'ay'lal axi uxumbechic ani axi inicbechic. Hua'ats axi lej jaylomchic c'al in c'al xi q'ue'at i inicchic ani hua'ats i cue'chic. Hua'ats ax in diosnalchic i thulcuts. ¹¹Jahua' nan tu ucha'chic al nixe' xi u jats axe', yab quit juncunchic c'al jitats quin ulu pel i ebchalab ani pelits i uxumbe. Max jaylom c'al in c'al axi q'ue'at, max in diosnal i thulcuts, max quithab cahuilix, max uts'al, max pel i cue' yab quit juncunchic c'al nixe'. Ma yab quit junax c'aputs c'al i ebchalab axi antsana' in ey. ¹²⁻¹³Yab u cuenta cu ts'ejca' axi yab exlomchic c'al a Dios, expith a Dios ne'ets quin ts'ejca'chic. Pel a uchbil tata'chic ca ts'ejca' axi pel i ebchalabchic c'al a Cristo max ca hualbin. Jaxtam a cua'al a uchbil ca t'ajat quethmay nixe' xi hualbinel ebchalab abal yabats ca tamcun c'al an ebchalabchic.

**An ebchalabchic axi othanchix
cau c'al i oc'lec axi yab
belom c'al a Cristo**

6 Hua'ats i ebchalab c'al tata'chic ax in othanchal an cau in at ebchal c'al a Cristo c'al i ts'ejcom cau axi yab im belal, ani expith in tomnal ca ts'ejcanchat an cau i ebchalab c'al in at ebchalabchic c'al a Cristo. ²Hualam max yab a tso'obits abal huahua' ax pel tu c'al a Dios ne'ets talbel qui ts'ejca' axi yab exlomchic c'al a Dios. Max antsana' ne'ets tit ts'ejcom c'al an inic talbel, jaquitsq'ui más a huit'al ca ts'ejca' i cau axi xo' yab q'uibat. ³Tata'chic ojni' hualam yab a tso'obits abal ma ne'ets qui baju qui ts'ejca' i ángelchic. Jaquitsq'ui más i ejtohual qui ts'ejca' i cau axi hua'ats teje' al an hualab c'ay'lal. ⁴Max a pejexnal jant'o teje' tsabal yab in tomnal quit ts'ejcanchat an cau c'al axi yab im belal a Cristo, cum yab bijithits quin co'oy in ey tin cuenta an tamcunel ebchalabchic. ⁵Pel a tithe max yab hua'ats jita' c'al tata'chic quin ejtou quin ts'ejcanchi an cau in at ebchal c'al a Cristo. ⁶Auxe' max i ebchalab c'al a Cristo in yejenchal quin othanchi an cau in at ebchal c'al i ts'ejcom cau axi yab im belal a Cristo. Iba.

⁷Tata'chic ojni' chubax a lej q'uibts'oth t'ajal max jant'o a pejexnal teje' tsabal. In tomnalac ca hualba'chic ta ba' max it t'ajchinal yab alhua' ani max it cue'chinal jant'o. ⁸Yab a hualbal ta ba'chic, ma a t'ajchal q'ue'atchic yab alhua' ani it cue'chic. Ma antsana' a t'ajchal a at ebchal c'al a Cristo jaye.

9-10 Yab ca hualca' ta ba' quit c'ambiyatchic. Hualam max a uc'chiyamal abal jitats in t'ajal yab alhua' yab ne'ets ca otsits ti eb jun tin t'ajal a Dios ti lej Ts'ale. Yab ne'ets ca otsits axi uxumbe ani axi inicbe, ax in diosnal i thulcuts, axi taunom uxum, axi co'ox c'al in at inic, axi cue', axi jaylom c'al in c'al q'ue'at, axi uts'al, axi quithab cahuilix, axi quin c'alnanchi in c'al q'ue'at i inic c'al i c'ambixtalab tin ichich. Ma ni jun jaja'chic yab ne'ets ca otsits. **11** Ti jayq'ui' talchic tata' antsana' pelac a ey, ani xo' itsots. A Dios ti paculanchits a hualab ani ti t'oquethanchits a ichich. Xohue' a Dios ti tsu'talits tit bolithchic cum a palenchal an Ajatic Jesús ani it c'ujchithits ta ichich c'al an Espíritu Santo.

T'ocat in inictal axi belom c'al a Cristo

12 Aba ani' lej chubax a Dios tu jilal qui t'aja' jahua' qui le'na'cua', bel yab fatal jahua' qui t'aja' tabat tu tolminchal. Aba ani' a Dios tin jilal cu t'aja' jahua' cu le'na', bel yab u hualcal tu ba' quin c'unat co'oyat c'al jant'oquitsq'ui yab alhua'. **13** Lej chubax jahua' u uxnal an c'apnel tabat tu tolminchal i chucul, ani i chuculcua' in c'a'inchal i c'apnel. A Dios talbel ne'ets quin t'aja' abal ca taley xi tsablom. A Dios yab tu pitha' i inictal abal cu uxumbejin, tocat tu pitha' abal qui binanchi jant'inits in culbetai quin eyentha' an Ajatic. Ani ja'its an Ajatic ax tu beletnanchal i inictal. **14** Jant'ini' a Dios in ejtha' an Ajatic c'al in lej tsap, antsana' ne'ets tucu ejtha'hue talbel ti al an jolimtalab.

15 Hualam max a uc'chiyamalchic abal a inictal pel in c'al a Cristo. Auxe' max in tomnal ca bina' ta ba' quit juncunchic c'al i taunom inic. Abal jay iba. **16** Hualam max yab a exbayalchic abal jita' ca juncun c'al i taunom inic u jumbel c'al jaja'. In ulal an T'ocat Thuchlab abal tam ca juncunits i inic c'al i uxum, tamna' a Dios in tsu'tal jumbejits jun c'al xi jun. **17** Jaye i inic axi ca juncun c'al an Ajatic, u jumbelits in ichich c'al an Ajatic.

18 Jaxtam ni hue' yab quit juncunchic c'al axi uxumbe ani c'al axi inicbe. An inic max ca hualbin ti uxumbe in otnal in cuete' inictal, ani max pil i hualabtalab quin t'aja' yab tin lej cuenta in inictal, yab in lej otnal in inictal. **19** Hualam max a uc'chiyamalchic abal ti c'ujchiyal a inictal an Espíritu Santo ani pel ejtil ti tiyopanil jaja'. A Dios ti pithamalchic an Espíritu Santo ti c'ujchiyal ta inictal ani yab pel a cuete' c'al. **20** Cum a Dios ti jalbith ts'a'iyamalchic, jaxtam pel a uchbil quit eyentha a inictal ani a ichich c'al a Dios abal ca puhuethanchat im bij jaja'. Xi tsablom pel in c'al a Dios.

An ts'alabchixtalab tin cuenta an tomquintalab

7 Nan ne'ets tu toc'tsiythic tin cuenta an cau ax tin abchi an u ti jayq'ui'. Lej chubax alhua' max an inic yab ca tomquin. **2** Aba ani' alhua' yab ca tomquin, bel in tomnal an inic ani an uxum ca tomquin cum hua'ats yan jita' in le' ti uxumbe ani ti inicbe. **3** Max

tomquithits an inic quim putu c'al in uchbil c'al in tomquil ani an uxum jaye quim putu c'al in tomquil. ⁴In inictal an tomquith uxum yab pel in cuete' c'al, pel in c'al jaye in tomquil. Jaye in inictal an tomquith inic yab pel in cuete' c'al, pel in c'al in tomquil. ⁵Yab ca hualca' ta ba' c'al an culbejntalab max a junax pejamalits an q'uij quit olonchic. Talbel quit junax culbechic junil, i canats max quit nixoc'na c'al a Satanás quit hualbin c'al q'ue'at tam yab a alhua' teycom a inictal.

⁶Jahua' nan tu uchalchic tin cuenta an tomquintalab pel u cuete' tsalap ani yab pel i uchbiti cau ax tim pitha' an Ajatic. ⁷U le'ac max patal an inicchic ca c'uajiy cuetem ejtil nana'. Bel a Dios im pithal an inicchic ti junchic im pithob max ca tomquin o max yab ca tomquin.

⁸An inicchic axi cuetem ani an tsemchith uxum axi cuetem u uchalacchic abal alhua' max ca jilc'on cuetem ejtil nana'. ⁹Bel ca tomquinchic max yab in ejtohual quin alhua' teyna' in le'nomtal abal in le' ti tomquinal. Alhua' ca tomquin ani yab ca uc'tsin c'al nixe' xi le'nomtalab.

¹⁰U cua'al i cau jaye ax tim pitha' an Ajatic, yab ja u cuete' cahuintal. An tomquith uxum yab quin jilcacay in tomquil. ¹¹Bel max quin jilcacay, tam ca c'uajiy cuetem ani max i, tam ca huichiy c'al in tomquil. Ani jaye an tomquith inic yab quin jilcacay in tomquil.

¹²Junaque i cau u le' tu ucha'chic axi pel u cuete' cahuintal yab im pithach c'al an Ajatic. Max i

ebchalab c'al a Cristo tomquithits c'al i uxum axi yab im belal a Cristo, yab quin jilcacay biyat max an uxum in cua'al in culbetal ca c'uajiy c'al jaja'. ¹³Aniye max i uxum im belal a Cristo ani tomquith c'al i inic axi yab im belal, yab quin jilcacay biyat max an inic in cua'al in culbetal ca c'uajiy c'al jaja'. ¹⁴Yab quin jilcacay, cum an tomquith inic axi yab im belal a Cristo ejtil max u huejlanchabac in ejattal c'al a Dios jaye, cum juncunenequits c'al i uxum axi belom ani huejlanchithits in ejattal c'al a Dios. Aniye an tomquith uxum axi yab im belal a Cristo ejtil max u huejlanchabac in ejattal c'al a Dios jaye, cum juncunenequits c'al i inic axi belom ani huejlanchithits in ejattal c'al a Dios. Jaye ejtil max u huejlanchabac in ejattal in tsacamilchic, cum yab pel in c'al axi yab im belalchic a Cristo. ¹⁵Expith max i tomquilab axi yab im belal a Cristo in lej le' quin jilcacay in tomquil ax im belal, quin jilcacay. Ani an tomquilab ax im belal a Cristo yab ca co'oyat c'al i tsaplab, cum pel in culbetal a Dios ca c'uajiy tomquith c'al in ichich jun ejet. ¹⁶Max it tomquith uxum ani a belal a Cristo hualam max ne'ets ca ejtou ca tolminchi a tomquil quim bela' a Cristo ani antsana' ca jec'ontha jaye. Ani tata' axi it tomquith inic ani a belal a Cristo hualam max ne'ets ca ejtou ca tolminchi a tomquil quim bela' a Cristo ani antsana' ca jec'ontha jaye.

¹⁷Ti junchic am belom quin t'aja' jant'inits ti pithach c'al an Ajatic ani jant'inits ti lejbanchamejits

quim baju c'al a Dios tam in it belamalits. Antsana' u uchbiyalchic quin t'aja' an ebchalabchic ax tim patal an tamcunel ebchalab abal ju'tamq'ui. ¹⁸Max tam tin it belamal an Ajatic cojchithits in inictal ejtil tam u t'ajchinal an Israelchic, antsana'its ca jilc'on. Max yab cojchithits in inictal tam quim bela', antsana'its ca jilc'on. ¹⁹Yab jant'o exbath max it cojchinenequits a inictal o max yab it cojchinene, expith lej exbath max ca t'ajchi in culbetal a Dios.

²⁰Jahuats pel in ey an inic tam tin it bela'its an Ajatic, antsana' quin eyna' in ey. ²¹Yab ca t'e'pixna' a ey max pelits it c'unat t'ojnal c'al a amu tam ta it bela'. Expith max a amu in le' ti hualca', tam bel quit c'alets. ²²Aba ma ani' pele it c'unat t'ojnal c'al a amu, bel it hualcanthanchamejits a ejattal abal quit eyentha c'al an Ajatic ma tam ta it bela'its an Ajatic. Ani max yab pel it c'unat t'ojnal c'al a amu, bel xohue' it c'unat t'ojnal c'al a Cristo. ²³Cum it jalbith ts'a'iyannejits c'al a Dios yab ca hualca' a ejattal ti thabalnanchi a at inic. ²⁴Ebchalabchic, quit c'uajiy c'al a Dios ani ta junchictal ca eynaye a ey axi pel a ey ma tam ta it bela'its an Ajatic.

²⁵Aba ani' yab u bats'umal i cau c'al an Ajatic cu uchbiy axi yab tomquithchic, bel ne'ets tu olchichic jahua' u cu'a'l tu tsalap tin cuenta jaja'chic. Cum pel i alhua' inic an Ajatic tim pithamalits u tsalap ax a ejtohual ca thacatna'. ²⁶Nan tu tsalap in tomnal max yab ca tomquin axi cuetemchic, cum

xo' hua'ats lej yan i yajchictalab ti al an hualab c'ay'lal. ²⁷Max it tomquithits' yab ca jilcacay a tomquil. Max yabaye it tomquith yab ca aliy jita' c'al quit tomquin. ²⁸Bel max it cuitol ani quit tomquin yab pel i hualabtalab, aniye jaye max it ts'ic'ach ani quit tomquin yab pel i hualabtalab. Expith tu uchhalchic abal axi tomquithchic ne'ets quin huat'a' más yajchic, ani u le'ac max yab antsana' ca huat'a'chic.

²⁹U lej le' tu ucha'chic jaye abal hue'its ne'ets ca taley an q'uij q'uicha. Jaxtam ebchalabchic, aba ani' it tomquith inic yab ca huat'ath tsalapnanchi jahua' in le' a tomquil. ³⁰Cum u lej c'unelits an q'uij q'uicha, max it t'e'pith yabats ca huat'ath tsalapna' a t'e'pitthal. Max it ajibalchic yabats ca huat'ath tsalapna' an q'uijithatalab. Max a ts'a'iyamal jant'o yab ca huat'ath tsalapna', cum yab expith tata' it thabal c'al a ts'ay'bil. ³¹Jitats in lej lubal quin tabatna' jahua' teje' tsabal yab quin huat'ath tsalapna', cum jahua' i tsu'tal teje' tsabal u talelits.

³²U lej le'ac max yab ti huat'ath t'e'pinthanchi a tsalap jahua' hua'ats teje' tsabal. An cuetem inic más in ejtohual quin lej tsalapnanchi in t'ojlabil an Ajatic ani más in ejtohual quin t'ajchi in culbetal an Ajatic.

³³An tomquith inic más in tsalapnal jahua' teje' tsabal ani quin t'aja' jahua' u le'nanchab quin t'aja' c'al in tomquil. ³⁴Pil in tsalap an tomquith uxum ani pil in tsalap an uxum axi yab tomquith. Axi yab tomquith más in ejtohual quin tsalapnanchi in

t'ojlabil an Ajatic ani más in ejtohual quin jum putat bina' in inicthal ani in ichich ca eyenthachic c'al a Dios. An tomquith uxum más in tsalapnal jahua' teje' tsabal ani quin t'aja' jahua' u le'nanchab quin t'aja' c'al in tomquil.

³⁵Nan tu uchalclic axe' xi cau expith abal tu tolmiythic, yab ja abal tu c'anchalq'ui. Expith u lej le'ac max ca t'aja' jahua' in tomnal axi pel in c'al an Ajatic ani ca t'ayat co'oy a ichich binanathits c'al jaja', ani yab quit xaybinchatchic a tsalap c'al jahua' teje' tsabal.

³⁶Max a cuá'l a ts'ic'achil ax in cuá'l hue' yan i tamub, ani max a tsalpayal in tomnal ca tomquin, jila' ca tomquin. Yab pel i hualabtalab.

³⁷Max a cuá'l a ts'ic'achil ani a junini' tsalpayamalits yab alhua' ca tomquin, alhua' max yab ca hualca' ca tomquin. ³⁸In t'ajal más alhua' jitats yab quim bina' in ts'ic'achil ca tomquin, ani in t'ajal hue' alhua' jitats quim bina' in ts'ic'achil ca tomquin.

³⁹An tomquith uxum in cuá'l in uchbil c'al an ts'ejcath cau ca c'uajiy c'al in tomquil tam biyat ejate in tomquil. Tam ca tsemets in tomquil, ma tamna'its in ejtohual ca tomquin c'al q'ue'at i inic max im belal jaja' jaye an Ajatic. ⁴⁰Nan tu tsalap ne'ets ca c'uajiy más culbel max yabats ca tomquin junil. Antsana' u tsalpayal, ani u belal abal jununul u tsalap c'al an Espíritu Santo ax tin c'uajchiyal tu ichich.

An c'apnel axi ts'acchixtalab c'al an thulcuts axi diosnab

8 Xohue' ne'ets tu olchichic i cau tin cuenta an c'apnel axi

ts'acchixnathits c'al an thulcuts ax u diosnab. Aba ani' lej chubax patal huahua' i ejtiyal i cau tin cuenta nixe' xi c'apnel, max expith ja i cau'c'al i ejtixtalab ti ichich, jats ne'ets qui c'athatna'. Max i cau'c'al jaye i c'anithomtalab ti ichich, jats c'al cu más utat c'uajiy c'al a Dios. ²Max i tsalpayal abal u lej tsalpathits c'al i cau, yabaye u lej chubax tsalpath cum yabaye i quithat ejtiyamal jant'ini' pel i uchbil qui quithat ejtiy. ³Max i c'anithal a Dios, jaja' tu tsu'tal pelits tu c'al.

⁴Tata'chic tin conoyamal max alhua' o yab alhua' ca c'apat an c'apnel axi ts'acchixnathits c'al an thulcuts. Huahua' ax i belal an Ajatic i ejtiyal abal an thulcuts ax u diosnab yab chubax pel i dios. Yab jant'o in exbath, cum expith hua'ats juncats a Dios. ⁵Hua'atscu'a' ti eb ani ti tsabal i dioschic, ma uxnal hua'ats yantalam i dioschic ani yantalam i ajaticchic. ⁶Huahua' i belal abal hua'ats juncats a Dios i Tata ti eb. Ja'its jaja' in tala' tujumal patal jahua' hua'ats, ani jats ojni' i ujnal qui puhuethanchi im bij. Hua'ats jaye juncats i Ajatic Jesucristo ax in tala' ts'ejcatal patal jahua' hua'ats, ani ja'its jaja' ax tu ejatliy.

⁷Yab tim patal ax im belal an Ajatic in ejtiyal an cau jahua' u t'iloxnal. Talchic jaja'chic ti jayq'ui' in ujnamal quin diosna' i thulcuts, ani ma xohue' bel in c'apalchic i c'apnel ts'acchixtalab c'al nixe' xi thulcuts ax u diosnab. Cum yab lej chubax in ichich jaja'chic tin cuenta nixe' xi c'apnel max alhua' ca c'apat

o max i, jaxtam in ats'al jolbith tin ichich tam quin c'apu. ⁸Yab tin ebal jant'o qui c'apu i ejtohual qui utenchi a Dios. Max qui c'apu o max yab qui c'apu yab ja c'al tu bats'uhuab c'al a Dios. ⁹Aba ani' it hualcathchic tin cuenta an c'apnel, bel ca t'aja' ti cuenta yab ca c'apu jahua' c'al ca t'apchin in tsalap i ebchalabchic axi palulul im belal an Ajatic. ¹⁰Hualam max jaja' ti tsu'tal tit quetel tit c'apul ti al i tiyopan jun tu c'ac'nab i thulcuts. Tata' a ejtiyal abal yab jant'o exbath abal ts'acchixname c'al an thulcuts jahua' a c'apal, ani axi palulul im belomtal yab in ejtiyal antsana'. Hualam ca utey jaja' jaye quin c'apu jahua' tin ichich in tsalpayal abal pel i hualabtalab max quin c'apu, ani tam quin c'apu ne'ets quin ats'a' jolbith tin ichich. ¹¹Antsana' a ebchal axi palulul im belomtal ne'ets quin ats'a' q'uibene in ichich max quin c'apu jahua' in tsalpayal tin ichich pel i hualabtalab max quin c'apu. Ani nix cum ti nits'biyal tata' ax it lej ejtixcua'. Ca t'aja' ti cuenta abal pel i ebchalab axi calchiyamejits c'al a Cristo ti al an cruz. ¹²Max c'al jahua' ca c'apu a c'olchal in ichich a ebchal c'al a Cristo axi palulul im belomtal, tam pel i hualabtalab ax a t'ajamal c'al a Cristo. ¹³Jaxtam nana' ni jayq'ui' yab ne'ets cu c'apu jahua' u ebchal c'al a Cristo in tsalpayal pel i hualabtalab ca c'apat. Yab cu t'apchi in tsalap c'al an t'u'lec ts'acchixtalab c'al an thulcuts ax u diosnab.

In eytal in abathualejilchic an Ajatic

9 Cum pel tin abathualejil an Ajatic yab in abatnab c'al

i inicchic, expith im pithnenec u eytal c'al an Ajatic. Ejtil xi q'ue'atchic i abathuale in tsu'umal i Ajatic Jesús, nana' jaye u tsu'umalne. Tejhua' abal chubax u t'ojonchal an Ajatic, cum tata'chic a belamalits an alhua' cau c'al u olchixtal. ²Tata'chic ojni' in tomnal más tiquin lej tsu'u tin abathuale c'al an Ajatic, cum nan tu olchamalchic an alhua' cau ani jats ta belamal an Ajatic. Hua'ats jita'chic yab antsana' tin tsu'tal tin abathuale.

³Jitats tin c'uiyalac quin ulu yab chubax pel tin abathuale u toc'tsiyalac antse'. ⁴C'al u t'ojlabil u ejtohualits nan cu bats'u jahua' quim pithan cu c'apu. ⁵Jaye u ejtohualac cu xe'tsintha' i tomquilab axi belom c'al a Dios, jant'in'i' jaye in xe'tsinthal axi q'ue'at an abathualechic ani an ebchalabchic ejtil a Pedro. ⁶Hualam max a tsalpayalchic abal expith a Bernabé ani nana' jats ax yab i ejtohual qui palc'anchi i cuete' t'ojlabil abal cu xe'tsin tu olnom c'al an alhua' cau. ⁷Auxe' max a exlalchic i soldado axi yab u jalbiyab c'al an oc'lechchic. Auxe' max hua'ats i thabal c'al an lab t'uthublom axi yab in ejtohualits jaye quin c'apu in hualil an lab t'uthublom. Auxe' max hua'ats i beletnom co'nel axi yab in ejtohualits jaye quin uts'unchi in letsajil an co'nel. ⁸Antsana' tu uchalchic jahua' lej exlath c'al patal an inicchic ti tabattalab, ani jaye ti al an ts'ejcath cau binath c'al a Moisés u olnab i tabattalab. ⁹Taja' in ulal abal yab ca melchin in hui' an hueyax tam u c'uchil c'al

in huitslabil an lab em abal quin ejtou quin c'apu. A Dios yab in ulu antsana' expith abal in t'ajchal ti cuenta in yejenchixtal an hueyax. ¹⁰In ulu jaye abal huahua' qui tso'obna' abal axi olnom c'al an alhua' cau ca tolmiyat c'al jitats in ats'al an alhua' cau. An xalum tsabal ani an c'uchil c'al an lab em in cuá'al in aychixtal abal quin tabatna' an ichlab lab em.

¹¹Huahua' i t'aychamal in cahuintal a Dios ta ichich tata'chic ani yab ca tsalpay max lej huat'ath a t'ajal max tucu tolmiy c'al jahua' teje' tsabal. ¹²Cum a tolmiyalchic axi q'ue'atchic i olnom c'al an alhua' cau, jaquitsq'ui más a uchbil tucu tolmiyhue.

Aba ani' pel a uchbil tata'chic tucu tolmiy, bel yab i conchamal jant'o tucu pitha'. I tala' cuxuyamal lejat i yejenchixtal, i canac cu bijiyat tu conchixma' ani tin ebal i conchixtal ca tanc'uiyat an alhua cau tin cuenta a Cristo. ¹³A alhua' tso'obits tata'chic abal jitats u t'oinal ti al i tiyopan tats tin calthal jant'o quin huat'axna'. Jitats u tolmix ti al an ts'acnaxtalab tats tu pithnal hue' in t'uul an ts'acnaxtalab co'nel. ¹⁴Antsana' jaye axi olnomchic c'al an alhua' cau, jats c'al ti quin huat'a' c'al jahua' ca pithan c'al ax im belal an alhua' cau. Antsana' pel in culbetal an Ajatic. ¹⁵Ni jayq'ui' yab u conchamal jahua' pel a uchbil tiquim pitha', ani yab tu thuchanchal axe' xi u abal tu conchi i tolmixtalab. In culbel cum u t'ojonchal an Ajatic nan tu cuenta. Max u cuá'al i yejenchixtalab alhua'

max quin tsemets t'ajat, ani yab tu conchichic i tolmixtalab.

¹⁶Yab u c'athat ulal pel tin alhua' inic abal in olnom c'al an alhua' cau. Cum ja'its u lej uchbil tin olnom, jaxtam lej yajchic tu uhual max yab cu olna'. ¹⁷Max cu olna' c'al u cuete' culbetal, a Dios ne'ets tiquim pitha' i atabilab, ani max cu olna' expith c'al i tsaplab tam iba. Bel max c'al u culbetal o max c'al i tsaplab pel u uchbil im pithach c'al a Dios tin olnom c'al an alhua' cau. ¹⁸An atabilab ax tim pithal a Dios pel i culbetalab tu ichich. In culbel cum tam u olnal an alhua' cau yab u yejenchal jant'o cu bats'u ti tolmixtalab c'al ax tin ats'al. U ejtohualac cu conchi jant'o cum pel in olnom c'al an alhua' cau, aba ani' bel yab u conchal.

¹⁹Aba ani' ni jita' tam inic yab tin abatnal, bel u binal tu ba' cu tolmiy tim patal an inicchic abal yantalam ca huenc'on c'al a Cristo. ²⁰U ejtilnal an Israel tam in c'ujat c'al jaja'chic abal ca huenc'onchic c'al a Cristo. Aba ani' ma yab in uchbith c'al an ts'ejcath cau binath c'al a Moisés, bel u t'ajal ejtil max in uchbith abal ca huenc'onchic jaye axi uchbith c'al an ts'ejcath cau.

²¹Tam cu olchi an alhua' cau axi yab Israel u ejtilnal jaja'chic jaye. Axi yab uchbith c'al an ts'ejcath cau u ejtilnal jaye abal ca huenc'onchic. Yab u ulal max u pojcanchal in abatnaxtal a Dios, expith u t'ajchal in abatnaxtal a Cristo. ²²U ejtilnal jaye axi palulul im belal an Ajatic abal antsana' cu ejtou cu tolmiy quin más bela'. U ejtilnal ma tim patal an inicchic max antsana' cu

ejtou cu tolmiythic quim baju ca jec'ontha c'al a Cristo. ²³Patal jahua' antsana' u t'ajal expith abal an inicchic quim bela' an alhua' cau, ani tam quim bela'chic cu junax lablinchat c'al a Dios.

²⁴A tso'obchic abal tam ca hua'tsin i ubat'intalab athiltalab patal ax u otsel u lej athil, ani expith juncats jitats ca ulits c'a'al ju'tam bijchame, jats ne'ets quim bats'u an atabilab. Ca ejtilna' tata'chic axi ca ulits c'a'al abal ca bats'u i atabilab c'al an Ajatic. ²⁵Patal jitats ca t'ojojon ca otsits al i deporte in lej alhua' beletnal tim ba' abal yab ca othey in inical. Antsana' in t'ajalchic abal quin ejtou quin ata' i atabilab corona axi ts'ejcath c'al i xeclec ts'ojol, ani tocat u talel in alhua'. Huahua' ax i t'ojonchal a Cristo i lubal qui ata' i atabilab axi yab jayq'ui' ne'ets ca taley in alhua'. ²⁶Jaxtam u lej punumalits tu ba' ejtil axi ca otsits al i athiltalab lej canat quin ata' i atabilab. U t'ajal ejtil i tamet cuathax axi lej canat quin ata' ani lej lujnith c'al in c'ubac ti cuathax. ²⁷U lej c'unuhual tu ba' cu t'ojonchi an Ajatic ani i cu q'uib'a' u chubax. U exobchamalits yan ax im belal an Ajatic quin t'ojonchi an Ajatic, ani u lej le' cu alhua' t'ojonchi i canats talbel quin uchan c'al a Dios yab in alhua' t'ojnal.

An inic yab quin diosna' i thulcuts

10 Ebchalabchic, nan u le' tu t'ilchi hue' jahua' a Dios in t'ajchi i biyal at juntalchic. In oc'nanchichic tim patal c'al i tocou ju'ta ta ca xe'tsin. In huat'ba'chic

tim patal jum poq'ue' al am pulic lejem Tsacni' Ja'. ²Tim patal jaja'chic in ayna' nixe' xi tocou ani tim patal jum poq'ue' huat'ba al am pulic lejem. Tam ti antsana' huat'ba, ejtil max pujnenec junax c'al a Moisés. ³Tim patal jaja'chic in c'apu i jununul c'apnel jahua' pithnenec c'al a Dios tam tin t'ajchichic i labith t'ajbilab. ⁴Tim patal jaja'chic in uts'a' i jununul ja' axi calthanchat al i t'ujub c'al a Dios. Nixe' xi t'ujub ejtil a Cristo ax im binanchi an Israelchic yan i lablinchixtalab, cum xe'tsin a Cristo junax c'al jaja'chic. ⁵Aba ani' a Cristo in lej lablinchichic, bel jat'hua' tim patal yab in t'ajchi in culbetal a Dios, ani jats ti jilanchic ca tsemets buc'uc'ul ti al an joltam quithiblom.

⁶Jahua' t'ajchinene nec nixe' xi Israelchic c'al a Dios pel i t'ipchixtalab c'al huahua'. I qui c'a'inchihue jahua' yab alhua' jant'in'i' jaja'chic in c'a'indi. ⁷Yab qui diosna' i thulcuts jant'in'i' talchic jaja'chic in diosna' ti jayq'ui'. In ulal an T'ocat Thuchlab abal hualim ti c'apuplatsq'ui ani uts'uts'latsq'ui ani ajbiblatsq'ui jaja'chic. Ma antsana' in t'ajamalchic biyat u eb c'ac'nax c'al a Dios tocat. ⁸Yab cu uxumbejin ani yab cu inicbejin ejtil talchic jaja'chic in t'ajamal, ani jun a q'uicha tsemets ma jun inic c'al ox mil. ⁹Yab qui tacchiquiy an Ajatic abal i canats yabats tucu c'aya'na'. Antsana' talchic jaja'chic in t'ajamal, ani jats ti tsemets tam ti ts'ican c'al i tsan. ¹⁰Yab qui ne'tha'chic i ichich toc'oc'ol c'al a Dios ejtil

talchic jaja'chic lej toc'oc'lats
ani tsemthachic c'al an ángel axi
bijithits c'al ta ca tsemtha.

¹¹Patal jahua' t'ajchinene i
biyal at juntalchic c'al a Dios pel
i t'ipchixtalab c'al huahua', ani
thuchathits ti al an T'ocat Thuchlab
abal qui exobna' ani qui lej t'aja'
ti cuenta cu xe'tsin bolith. Qui
lej t'aja'chic ti cuenta jant'ini' tu
cu xe'tsin, cum hue'its ne'ets ca
taley an q'uij q'uicha. ¹²Jitats in
tsalpayal abal lej junini' xe'ets c'al
a Dios, quin lej alhua' belatna' tim
ba' abal i ca ijcan al i hualabtalab.
¹³Tata'chic jant'ini' a at inic tim
puhuel an tsabal it nixoc'nab c'al an
teneclab abal quit hualbin. A Dios
ne'ets ti jila' quit nixoc'na expith
ma ju'tam huichat ca ejtou ca cuxuy.
Ne'ets ti tolmiy ca cuxuy ma tam
quit lo'panits.

¹⁴C'an ebchalabchic, tu uchal ca
lej t'aja' ti cuenta yab ca diosna' i
thulcuts. ¹⁵Cum it tsalpathchic a
lej huit'al ca ejtiy an cau jahua' nan
tu uchal tin cuenta i thulcuts ax u
diosnabchic. ¹⁶Tam huahua' i t'ajal
an santa cena i binal i c'ac'namal
yan c'al a Dios. Tam qui uts'a' an
vino i tejhua'methal abal jun ejet
jun c'al xi jun i junax tabatnanchal
in xits'al a Cristo ax in huac'la' ti al
an cruz. Tam qui c'apu an mu'uth
pan i tejhua'methal abal jun ejet jun
c'al xi jun i junax tabatnanchal in
anam t'uul a Cristo ax im bina' ca
yajchiquiyat ti al an cruz. ¹⁷Juncats i
pan i mu'uhual ani yan ti eb huahua'
i c'apal. Patal huahua' ti yaneltal ejtil
max pel tu juncats inictal a Cristo.

¹⁸Ca t'aja'chic ti cuenta jahua'
in t'ajal an Israelchic ax in c'apal

an ts'acchixtalab ax u binab ti al
in tiyopanil. In tejhua'methalchic
abal jun ejet jun c'al xi jun in junax
tabatnanchal an ts'acchixtalab.

¹⁹Tam cu t'iloxna' an thulcuts ax
u diosnab yab u le' cu ulu max
in cua'al in exbath. Yab u le' cu
ulu max lej t'ocat an t'u'lec ax
u ts'acchiyab an thulcuts. Pel i
alq'uth tsemthach t'u'lec. ²⁰Jahua'
u ulal jats abal an inicchic axi yab
exlom c'al a Dios tam ca ts'acchixin
c'al an thulcuts tocat in ts'acchiyal
i teneclabchic. Yab antsana' in
c'ac'nalchic a Dios. Yab u le' abal
tata'chic ca c'ujayi c'al i inicchic
tam in c'apal jahua' tocat tin
ts'acchiyal i teneclabchic. ²¹Yab
a ejtohualchic ca uts'a' an vino
ax u uts'nal ti t'ilaxtalab c'al an
Ajatic ti al an santa cena ani jun
t'ajat ca uts'a'chic jaye i uts'nel ax
u ts'acchixnab c'al i teneclabchic.
Yab a ejtohualchic ca c'apu an
mu'uth pan axi pel i t'ilaxtalab
c'al an Ajatic ani jun t'ajat ca c'apu
jaye am pan ax u ts'acchixnab
c'al i teneclabchic. ²²Yab qui t'aja'
antsana', i tucu pa'ixna' an Ajatic.
Auxe' max huahua' u lej pulic ani
a Dios yab ja pulic. Expith jaja' jats
axi lej pulic ani i lej cua'al i uchbil
qui c'ac'na'.

**Jahua' a Dios tu jilal qui t'aja'
ani an c'anithomtalab**

²³Aba ani' lej chubax a Dios tu
jilal qui t'aja' jahua' qui le'na'cua',
bel yab patal jahua' qui t'aja' tabat
tu tolminchal. Aniye yab patal
jahua' qui t'aja' c'al u tolminchab
an ebchalabchic c'al a Cristo quin
más tsapna' ani quin más c'ac'na'

a Dios. ²⁴Qui luba' qui t'aja' jahua' alhua' abal ca tabatnanchat c'al q'ue'at i inicchic, ani yab expith qui t'aja' jahua' huahua' qui cuete' tabatna'.

²⁵A ejtohualchic ca c'apu patal jahuaquits tam c'apnel ax u nujuhuab ti al i nujumtalab ani yab ca conomichiquiy ta ichich hualam max alhua' o hualam max yab alhua' ca c'apat. ²⁶Cum an tsabal ani patal jahua' hua'ats teje' tsabal pel in c'al an Ajatic.

²⁷Max jita' axi yab im belal an Ajatic ti caniychic quit junax c'aputs tin q'uima', quit c'ale max a cua'al a culbetal. Ca c'apchi patal jahua' ti mo'canchi ca c'apu ani yab ca conomichiquiy ta ichich hualam max alhua' o hualam max yab alhua' ca c'apat. ²⁸Expith yab ca c'apchi max jita' ti uchal abal nixe' xi c'apnel ts'acchixnamejits c'al i thulcuts ax u diosnab, i canats ca t'apchin in tsalap max in tsalipayal tin ichich abal pel i hualabtalab nix ca c'apat. ²⁹U ulal abal jaja' ja'its axi ne'ets quin ats'a' jolbith tin ichich ani tata' iba.

Hualam max ne'ets ca ulu tata'chic jale' quin ulu q'ue'at i inic jahua' alhua' ani jahua' yab alhua' nan cu c'apu. Hualam ca ulu yab a cuenta max in ats'al jolbith tin ichich q'ue'at max ca c'apat i c'apnel axi ts'acchixnathits c'al an thulcuts. ³⁰Hualam ca ulu abal a binal i c'ac'namal yan c'al a Dios cum ti pitha' ca c'apu, ani hualam ca tsalpay yab in uchbil q'ue'at ti jolbiy max ca c'apu. ³¹Ne'ets tu ucha'chic jale' ta ca lej t'aja' ti cuenta c'al jahua' ca c'apu. Cum pel

a uchbil ca puhuethanchi im bij a Dios patal jahuats ca t'aja'chic. Max ca c'apu jant'o ani max ca uts'a' jant'o expith ca puhuethanchat im bij a Dios. ³²Yab ca t'apchi in tsalap jita' tam inic c'al a t'ajbil. Axi i Israelchic ani axi yab Israel ani im bichohuil a Dios ni jant'o yab ca t'ajchichic c'al ca t'apchin in tsalap ti belowm. ³³Nan tu uluth ichich u lubal cu t'aja' expith jahua' c'al ca tolminchat tim patal u at inic ca jec'onthachic c'al an Ajatic. Yab u lubal cu t'aja' expith jahua' tabat tin tolminchal nana'.

11 Ma ju'tam huichat nan u nits'binchal in xe'tsintal a Cristo, antsana' tata'chic tiquin nits'binchi u xe'tsintal c'al a Cristo.

An uxumchic tam ti tamcunal c'al an ebchalabchic

²Ebchalabchic, nan u tsu'tal alhua' jahua' a t'ajal cum ets'ey tin t'ilchal u t'oqlabil c'al an Ajatic ani ets'ey a aynanchal an cau ax nan tu huat'banchamal. ³U lej le' abal ca ejtichic abal a Cristo jaja'its an lej Oc'lec c'al patal an inicchic, ani an tomquith inic pel i oc'lec c'al in tomquil. A Dios ja'its u Oc'lec c'al a Cristo. ⁴Pel i tithetaltalab max paxq'uiq'uith in oc' an inic tam u ol al an tamcunel ebchalab, ani jaye tam u caulome c'al i cau axi ca pithan c'al a Dios quin huat'banchi an tamcunel ebchalab. ⁵An uxum ojni' quin co'oy in oc' paxq'uiq'uith tam u ol ani jaye tam u caulome ti al an tamcunel ebchalab. Pel i tithetaltalab max yab in cua'al in oc' paxq'uiq'uith, cum ejtil max huatsinchatac in oc'

ejtil max pelac i inic. ⁶Alhua' max ca muts'inchat in xi'il max yab in le' quim paxq'uiy in oc' ti al an tamcunel ebchalab. Ani max pel i tithetatalab ca muts'inchat in xi'il o ca huatsinchat in oc' ejtil i inic, in tomnal an uxum quin co'oy in oc' paxq'uiq'uith ti al an tamcunel ebchalab. ⁷Yab in tomnal an inic paxq'uiq'uith in oc' ti al an tamcunel ebchalab, cum in ey hue' ejtil in ey a Dios ani cum hue' abatnom ejtil a Dios pel i Abatnom. Cum a Dios Abatnom c'al an inic jats tu tejhua'mel abal lej c'athpich pulic in ey. Cum an inic abatnom c'al an uxum, jats tu tejhua'mel abal pulic in ey an inic. ⁸A Dios in ts'ejca' an oc'ox inic. An inic yab tal c'al an uxum, an uxum ojni' jats tal c'al an inic. ⁹Jant'ini' tin ts'ejca' a Dios an uxum, u abatnab jaja c'al an inic ani yab pel in ey ti abatnom c'al an inic. ¹⁰Jaxtam in tomnal an uxum paxq'uiq'uith in oc' abal quin tejhua'methanchi ma c'al i ángelchic abal u abatnab c'al an inic. ¹¹An inic ani an uxum u yejenchix jun c'al xi jun. Antsana' huahua' ax i belal a Cristo i tsu'chal in ey an inic ani in ey an uxum. ¹²Chubax tal an oc'ox uxum c'al an inic axi ts'ejcathits, ani xohue' ojni' tal an inic c'al an uxum. C'al a Dios ja'its tu tal patal jitats ani jahuats hua'ats.

¹³Tata'chic a ejtohualac ca ulu max in tomnal an uxum ca olon ti al an tamcunel ebchalab yab quin co'oy in oc' paxq'uiq'uith. ¹⁴A cuete' tsalap ti uchal abal titheatal an inic max huat'ath nactha' in xi'il. ¹⁵An uxum iba, cum jats in tomnal

nactha' in xi'il ani jats tu tsu'tab ti alabel. Jats c'al ca paxq'uin in oc'. ¹⁶Hualam hua'ats jita' c'al tata'chic in le' quin hueutsixna' c'al axe' xi cau. Expith tu uchalchic abal in ujnamits tim patal an tamcunel ebchalabchic an uxum quin co'oy paxq'uiq'uith in oc' tam u ol ani jaye tam u caulome c'al i cau axi ca pithan c'al a Dios quin huat'banchi an tamcunel ebchalab.

Am belom axi yab in t'ajal alhua' ti al an santa cena

¹⁷Nan tu uchalchic abal junchiquil yab alhua' jahua' a t'ajalchic tam it tamcunal tit c'ac'nax c'al a Dios, ani jaxtam yab lejat ela' tabat max a Dios ti tolminchits c'al a ejattal. ¹⁸Uxnal abal it lehuáx tam quit tamcunchic, ani hualam chubax anits a t'ajalchic. ¹⁹Tata' ojni'chic hualam a tsalpayalchic abal in tomnal tit lehuáx abal ca tejhua'metha' jahua' tam cuenel ax in t'ajal más tequeth ani jahua' iba. ²⁰Max antsana' it lehuáx tam ta ca t'aja' an santa cena tejhua' abal yab lej chubax a c'ac'nalchic an Ajatic. ²¹Expith it tamcunalq'ui ani it c'apulq'uihic. Ta junchictal a xijc'ath c'apal jahua' a chi'thamal ca junax c'apat, ani jaxtam hua'ats jita'chic yab u jilchinal jant'o quin c'apu ani u c'a'il. Ma hua'ats jita'chic u uts'alq'ui. ²²Auxe' max yab a cu'a'l a q'uima'chic jun ti quit c'aputsq'ui ani quit uts'latsq'ui. C'al a t'ajbil antsana' tocat a otnanchalchic in q'uima' a Dios ani a tithebethal an ebchalabchic axi ts'ejhuantal. Hualam a le'chic abal nan cu ulu

abal lej alhua'its jahua' a t'ajalchic. Ni abal jay yab u lejel cu ulu max alhua' jahua' antsana' a t'ajalchic.

An santa cena

(Mt. 26.26–29; Mr. 14.22–25; Lc. 22.14–20)

²³Tim pithamal i cau an Ajatic tin cuenta an santa cena ani jats ax tu huat'banchamalchic. Im bajumalits nixe' xi acal tam a Judas ne'ets quim bina' i Ajatic Jesús ca tsemtha. An Ajatic im pena' am pan. ²⁴Im bina' i c'ac'namal yan c'al a Dios ani tiq'uele in mu'u am pan. Im pithanchi in exobalilchic ani in ucha': Ca c'apu axe' xi pan cum pel u inictal axi ne'ets cu bina' quin yajchiquiyat tin calchix c'al tata'chic. Tiquin t'ilá' tam antsana' ca c'apuchic axe' xi pan. ²⁵In c'apuchic am pan ani tiq'uele a Jesús im pena' an uts'umtalab c'al an vino. Im bina' i c'ac'namal yan c'al a Dios. Im pithanchi in exobalilchic ani in ucha': Pel u xits'al axi ne'ets cu huac'la' al an cruz. Tin ebal u xits'al a Dios ne'ets quin ts'ejca' i it jilchith cau c'al an inicchic. Tiquin t'ilá' antsana' tam ca uts'a'chic axe' xi vino, in ulu an Ajatic. ²⁶Jay i calel tata'chic ca c'apu axe' xi pan ani ca uts'a' axe' xi vino a tejhua'methanchal c'al a at inicchic abal tsemets an Ajatic ti calchix al an cruz. Antsana' ca t'aja'chic ma ta ca chich junil an Ajatic.

Ca t'ajan an santa cena c'al i tequethtalab

²⁷In t'ajal i hualabtalab jitats quin c'apu am pan ani quin uts'a' an vino ti al an santa cena max yab

c'al i lej tequethtalab tin ichich. Jolbithits tin tamet a Dios, cum ejtil max in tilibnanchal in inictal ani in huac'lath xits'al an Ajatic. ²⁸Yab ca c'apuchic am pan ani yab ca uts'a' an vino ti al an santa cena max yab oc'ox ca lej alhua' tsalpay ta ichich max it lej chubax c'ac'nax c'al a Dios. ²⁹Ne'ets ca jolbiyat c'al a Dios jitats quin alq'uth c'apuq'ui ani quin alq'uth uts'a'q'ui. Yab in lej alhua' penamalits tin ichich max nixe' xi pan pel i t'ipchixtalab c'al in inictal an Ajatic axi yajchiquinchat ti al an cruz. ³⁰Jaxtam hua'ats c'al tata'chic yan ax u ya'ul ani yan ax u palulul in inictal, ma talchic tsemetsits. ³¹Yab ne'ets tucu jolbiy an Ajatic max u lej chubax c'ac'nax c'al jaja'. ³²Max tucu jolbiy ani tucu yajchiquiy, jats expith abal yab cu jum putat jolbiyat jant'ini' ne'ets ca jum putat jolbiyat axi yab exlomchic c'al a Dios.

³³Taley ebchalabchic, tam quit tamcun ca t'aja' an santa cena quit aychixin tam ne'ets tit c'apul, ani yab ca luba' ca xijc'ath c'apu cuetem. ³⁴Jitats u lej c'a'il ca oc'ox c'aputs tin q'uima' abal i ca jolbiyat c'al a Dios max ca xijc'ath c'aputs tam ti tamcuth c'al an ebchalabchic. Hua'atse i cau axi ne'ets cu ts'ejca' talbel tam quin ulits c'al tata'chic.

An huit'omtalab ax u pithnal an ebchalabchic c'al an Espíritu Santo

12 Ebchalabchic, u le' tu olchi tsab ox i cau tin cuenta i huit'omtalab ax u pithnal ti junchic an ebchalab c'al an Espíritu Santo.

²A lej tso'obchic abal tam ti yabaye a belamal a Cristo a diosnamal jahuaquitsq'ui tam thulcuts, ani in eythic expith mo'chic. ³Xohue' hua'ats i inicchic axi in ulal ca t'ajat q'uibey a Jesús. Ca lej tso'obna'chic abal yab ja ax u cahuinthab c'al an Espíritu Santo. Hua'ats jita'chic jaye ax in ulal abal a Jesús ja'its an Ajatic. Ja'its ja ax u cahuinthab c'al an Espíritu Santo.

⁴Pil i huit'omtalab in cua'al an ebchalabchic, ani juncats an Espíritu Santo c'al tu pithanchab an huit'omtalab jahuats in cua'al. ⁵Pil i t'oqlab ax in aynal an ebchalabchic c'al an Ajatic, ani juncats an Ajatic ax in t'ojonchalconchic. ⁶Hua'ats axi jayetseq'ui in cua'al jununul an t'oqlab ani in t'ajal hue' pil, ani juncats a Dios c'al tu t'ojonthabchic. ⁷Cum ti junchic an ebchalabchic u pithnal i huit'omtalab jats tu exlab abal c'uajchithits c'al an Espíritu Santo, ani u pithnal abal quin tolminchi tim fatal an ebchalabchic quin más tsapna' a Dios. ⁸Jun u pithnal c'al an Espíritu Santo i tsalpathatalab ti ts'alabchix, ani axi junaque u pithnal quin ejtinchi ani quin exobchixnanchi jahua' ma xohue' pelac in tsinat tsalap a Dios. ⁹Jun u tolmiyab c'al an Espíritu Santo quin lej c'athpich bela' a Dios, ani axi junaque u pithnal i huit'omtalab ti jelthom. ¹⁰Talchic i ebchalab in ejtohualchic quin t'aja' i labith t'ajbilab, cum u pithnal an huit'omtalab c'al an Espíritu Santo quin t'aja'. Hua'ats axi lej huit'om ti caulome c'al i cau axi ca pithan c'al a Dios. Hua'ats ax in huit'al quin exla' i inic max

u cahuinthab c'al i teneclab o max chubax u cahuinthab c'al an Espíritu Santo. Hua'ats ax im bats'uhual i huit'omtalab ti cau c'al pil i cahuinalab axi yab in cuete' cahuinal, ani hua'ats axi huit'om quin lejquinchi jahua' antsana' u caunab. ¹¹Juncats an Espíritu Santo ax im pithanchal tim fatal an huit'omtalab ti junchic an ebchalabchic jant'ini' jaja' quin le'na' quim pithanchi.

Yan ti eb pel ejtil tu inictal a Cristo

¹²Juncats huahua' i inictal ani yan i punchintal. Huahua' ax i belal a Cristo yan ti eb pel ejtil tu juncats inictal a Cristo. ¹³Ti junchictal pel ejtil tu punchintal in inictal a Cristo. Pel tu Israelchic ani pel tu griegochic. Talchic huahua' tu c'unat co'oyal i amu ani talchic iba. U pujnenec c'al xi juncats an Espíritu Santo ani fatal yan ti eb pel ejtil tu juncats inictal a Cristo. Huahua' ti fatal u t'u'thithinchithits i ichich c'al xi juncats an Espíritu Santo.

¹⁴I inictal in cua'al yan im punchintal ani yab expith jun.

¹⁵Max in ejtohualac ti cau i acan auxe' max quin ulu abal yab ajith al i inictal cum yab pel i c'ubaclec. Max ani' antsana' quin ulu, bel pel im punchintal i inictal. ¹⁶Auxe' max quin ulu i xutsun abal yab ajith al i inictal cum yab pel i huallec. Max ani' antsana' quin ulu, bel pel im punchintal i inictal.

¹⁷Max expith i cua'alac i hual yab ne'ets qui ejtou qui ats'a' i cau. Max expith i cua'alac i xutsun yab i ejtohualac qui jica' jant'o. ¹⁸Jats

a Dios ax tu punchinchamalits c'al im punchintalchic i inictal jant'inits jaja' tin le'na'. ¹⁹ Yabac quithat i inictal max juncatsac i punchintalab in cua'al. ²⁰ Aba ani' i inictal in cua'al yan im punchintal, bel i inictal juncats tu inquith.

²¹ Max i hual quin ucha' i c'ubac nan yab tu yejenchal, yab chubax. Ani max i oc' quin ucha' i acan nan yab tu yejenchal, yab chubax. ²² Im punchintalchic i inictal axi lej yajbil jats axi más lej exbath in ey. Jats i lej yejenchalchic. ²³ Im punchintalchic i inictal axi yab lej exbath in ey jats más i lej beletaln. Jahua' yab lej alabel ti inictal jats i lej alhua' c'ua'chimath. ²⁴ Jahua' lej alabel ti inictal yab i t'ajal ti cuenta max alhua' c'ua'chimath. A Dios tu punchinchamalits c'al im punchintalchic i inictal abal quin co'oy in c'athpich ey i punchintalab axi yab lej ajith max lej exbath in ey. ²⁵ Yab u tomolnáx im punchintalchic i inictal, tocat u junax tolmíx. ²⁶ Max u yajbel jun im punchintal i inictal, ne'ets quin junax yajchicna' tim fatal i punchintal. Max ca ts'u'tat lej exbath in ey jun, ne'ets ca junax culbe fatal im punchintal i inictal.

²⁷ Huahua' ti tamcuth fatal pel ejtil tu inictal a Cristo, ani ti junchictal pel ejtil tu punchintal in inictal a Cristo. ²⁸ A Dios im punumalits tim bichohuil talchic i belom axi c'athpich in ey. Oc'ox hua'ats i abathualechic. Tsabchil hua'ats ax u caulome c'al i cau axi ca pithan c'al a Dios. Oxchil axi exobchixchic c'al in cahuinalt a Dios. Taley hua'ats jaye ax in

t'ajalchic i labith t'ajbilab. Hua'ats i jelthomchic. Hua'ats axi tolmixchic c'al an ebchalablol an jaye axi oc'nomchic c'al an ebchalablol. Hua'ats jaye ax u cauchic c'al pil i cahuinalt ab in cuete' cahuinalt. ²⁹ Yab tim patalchic pel i abathuale, o pel i caulome, o pel i exobchix, o pel i t'ajax c'al i labith t'ajbilab. ³⁰ Yab patal in huit'alchic ti jelthom c'al an ya'ulchic, o ti cau c'al pil i cahuinalt, o ti lejquinchix c'al jahua' u caunab antsana'. ³¹ Ca luba'chic quit pithan c'al a Dios i huit'omtalab axi lej huinat alhua'. Taley ne'ets tu olchiyechic axi lej c'athpich huinat alhua' ca co'oy.

An c'anithomtalab

13 Aba ma u lej huit'alac cu huilchi i cau ejtil i inic ani i ángel axi lej c'athpich huit'omchic ti cau, jolat max yab u c'anithal u at inic. Tin ats'anchalac u cahuinalt ejtil max pel i ts'ilij tambor ani ejtil i platillo axi c'uiyoyolq'ui tocat. ² Hualam max in caulomejac c'al i cau ax tim pithal a Dios. Hualam max u tala' exbayalac i luputh tsinat cau axi tsincanchame u biyal juntalchic. Hualam max u quithat exlalac fatal an cau jahua' hua'ats. Hualam max u lej c'athpich belalac a Dios ma cu ejtou cu tauna' an ts'en ani ca huat'ba ju'tamits tu cu le'na'. C'al fatal nixe' max u huit'alac, bel jolat max yab in c'anithom c'al u at inic. ³ Jolat max cu tala' nuju jahua' u cua'al ani cu ts'ejhualiyq'ui an ts'ejhuantalchic c'al an tumin. Jolat max cu bina' tu ba' quin tala' chicchin u inictal abal in olnom c'al an alhua' cau. Hualim

jolat max antsana' tu cu t'aja' ani yab in chubax c'anithom c'al u at inic.

⁴Jitats u c'anithom lej c'aya'nax c'al in at inic. In t'ajchal i alhua'talab. Yab pa'ixnom. Yab in c'athatnal tim ba' ani yab in t'ajal ti pulic. ⁵Yab in t'ajal quithab. Yab ts'e'ne. Yab u tsacul. In hualbal tim ba' max ca t'ajchin jant'o yab alhua'. ⁶Yab u culbel tam in at inic ca hualbin, expith u culbel tam quin t'aja' jahua' tequeth. ⁷Jitats u c'anithom yab thubat in olnanchal jahua' quin t'aja' yab alhua' in at inic. Ets'ey im belal ani ets'ey in aychal ca alhua'me in at inic. In tala' cuxuyal jahuats ca t'ajchin jahua' yab alhua'.

⁸An c'anithomtalab in ey abal ets'ey ne'ets ca ohuey. Ne'ets quim baju a q'uicha tam ca taley an huit'omtalab ti caulome c'al i cau jahua' ca pithan c'al a Dios. Ne'ets ca taley an huit'omtalab ti cau c'al pil i cahuintalab axi yab pel in cuete' cahuintal. Ne'ets ca taley an huit'omtalab ti exlom c'al i cau axi teje' tsabal. ⁹Xohue' teje' tsabal expith talchic i cau i exlal ani i bajuhual qui olnanchi expith talchic in cahuintal a Dios. ¹⁰Axi talchic i cau i exlal teje' tsabal ne'ets ca taley talbel tam quim bajuhuits a q'uicha qui quithat exla' an cau axi a Dios tu bijchamalits ne'ets qui exla'.

¹¹Tam ti nan pelac in tsacame in cahuin ani u tsalpay jant'ini' in ey i tsacam ca cahuin ani quin tsalpay. U exbay i cau ma ju'tam huichat in huit'al i tsacam quin exbay. Tam tin inicbejits yabats u

tsalpay ani yabats u t'aja' ejtil tam tin tsacame. ¹²Xohue' expith lej hue' i exbayal ejtil max tu tsacame. Ma tam talbelaquits ne'ets qui quithat exbay i cau ani patal jant'o hua'ats ejtil xohue' huahua' tu quithat exbanchab c'al a Dios. Xohue' u c'ujat ejtil i inic ax in tsu'tal jant'o al i lam yamumul yab lej tajax. Ma tam talbelaquits ne'ets qui lej jum putat tajax tsu'u. ¹³Ne'ets ca ohuey abal ets'ey am belomtalab ani an aychixtalab ani an c'anithomtalab. Jahua' lej c'athpich huinat alhua' jats an c'anithomtalab.

Axi huit'om ti cau c'al pil i cahuintalab

14 Ca lej luba'chic ca c'anitha' a at inic, ani jaye jun t'ajat ca le'na' ca co'oy an huit'omtalab axi a Dios in le' ti pitha'chic. An c'athpich huit'omtalab jats max quit pithan tit caulome c'al a Dios c'al an cau jahua' jaja' ti pithal. ²Max it cau c'al pil i cahuintalab axi yab u exlanchab c'al a at inic yab ne'ets quit exlanchat in ey jahua' a ulal. Expith a Dios ti ats'anchal ani an inic iba. Pel xe' i cau ax it pithnalchic c'al an Espíritu Santo ani yab ja ax u exlab c'al ax ti ats'alchic. ³Axi caulome c'al a Dios ojni' u exlanchab an cau c'al ax im belal an Ajatic abal quin más tsapna' a Dios. U canatmethanchabchic in tsalap ani u culbethanchab in ichich c'al in cahuintal an caulome. ⁴Jitats cau c'al pil i cahuintalab axi yab u exlanchab c'al in at inic, expith in tolmiyal tim ba' quin más tsapna' a Dios, ani axi caulome c'al a Dios in

tolminchal an tamcunel ebchalab quin más tsapna' a Dios.

⁵ U le'ac max patal tata'chic ca ejtou tit cau c'al pil i cahuintalab, ani u c'athpich le'ac max ca ejtouchic tit caulome c'al an cau jahua' a Dios ti pithal. In cu'a'l in c'athpich exbath axi caulome c'al a Dios yab ejtil axi cau c'al pil i cahuintalab. Expith ca cahuin axi cau c'al i pil cahuintalab max hua'ats jita' ti al an tamcunel ebchalab axi quin ejtou quin lejquinchi an cau ax u caunab. Antsana' ca tolminchat an ebchalabchic quin más tsapna' a Dios. ⁶Auxé' max tata'chic tit ebchalab tabat ne'ets quit tolminchat max quin ulits c'al tata'chic ani tu caunanchi pil i cahuintalab axi yab a huit'al ca exla'chic. In tomnalac max nan tu caunanchichic i t'ilomtalab ax tin tso'oblinchamal a Dios ani tu olnanchi an chubaxtalab. In tomnalac max tu huat'banchichic i cau ax tim pithal a Dios ani tu exobchi c'al in cahuintal a Dios. Ja'its ojni' ne'ets ti tolminchichic.

⁷ Qui eyentha' ti t'ipchixtalab jahua' yab ejat an tsul ani an ajab. Cum pil in cahuithchic jats tu ejtohuab ca exla jahua' an tsul ani jahua' an ajab. ⁸Max ca juchuyat an trompeta ani yab ca lej exlanchat in cahuith yab ne'ets ca t'ojojon i soldadochic abal ti pejéx. ⁹Aniye jaye c'al tata'chic tam it cau. Max yab ca caunanchi a at inic c'al i exlath cahuintalab yab ne'ets ti ejtinchi jahua' a ulal. Ejtil max alq'uith tsayuyulq'ui a cahuintal. ¹⁰Lej chubax hua'ats

yan i cahuintalab teje' tsabal ani patal xe' u exlanchab c'al talchic i inicchic. ¹¹Max yab u exbanchal i cahuintalab c'al tin taunal i inic ne'ets cu tsu'úxin tu pil inic. ¹²Cum it lej canatchic quit pithan i huit'omtalab c'al an Espíritu Santo, jaxtam ca lej luba'chic ca conchi a Dios abal ti pitha'chic i huit'omtalab axi c'al ta ca más tolminchat an tamcunel ebchalab quin más tsapna' a Dios.

¹³Jitats quin caunanchi an tamcunel ebchalab i pil cahuintalab axi yab u exlanchab in ey an cau, quin conchi a Dios i huit'omtalab abal quin ejtou quin lejquinchi jaye nixe' xi cau. ¹⁴Tam tin ol max u caunal i pil cahuintalab expith in olq'ui c'al u ichich ani yab u lej ejtiyal an cau jant'o in ey u ulalac. ¹⁵In tomnalac tin ol c'al u ichich ani jaye cu lej ejtiy an cau jant'o in ey u ulal tam tin ol. Antsana' in tomnalac jaye tam cu ajatnanchi im bij a Dios.

¹⁶Max a binal i c'ac'namal yan c'al a Dios c'al pil i cahuintalab expith it olq'ui c'al a ichich, ani axi yab in ejtinchal nixe' xi cahuintalab yab ne'ets quin ejtou quin junax bina' i c'ac'namal yan c'al a Dios. ¹⁷Hualam max alhua'ac a c'ac'naxtal c'al i pil cau, expith tocat yab a tolminchal jaye xi q'ue'atchic quin más tsapna' a Dios. ¹⁸U binal i c'ac'namal yan c'al a Dios abal in lej huit'om tin cau c'al i pil cahuintalab yab ejtil tata'chic. ¹⁹Aba ani' in lej huit'om, bel más alhua' cu ulu bo' i cau axi ca ejtinchat c'al an tamcunel ebchalab, ani iba lajuj mil i cau axi yab ca ejtinchat cum pel i pil cahuintalab ani yab in cuete' cahuintal.

20 Ebchalabchic, ca co'oy a tsalap ejtil axi lejinicbejits ani iba ejtil i lej tsacam. Expith ca bajuchic a ey ejtil i tsacam axi yab in culbetnal jahua' yab alhua'. **21** In ulal an T'ocat Thuchlab jahua' in ulu a Dios ti jayq'ui' antse': Ne'ets cu aba' i pil inicchic tiquin taunanchi u bichohuil c'al i pil cahuinalab, ani aba ma antsana' ca caunanchat i cau yab ne'ets tiquin t'ajchi ti cuenta u cahuinal. **22** C'al nixe' xi cau i exlal abal yab ja ax im belal a Dios ax tu tejhua'methanchab in tsap a Dios tam ca caunanchat i pil cahuinalab yab exlath, expith axi yab im belal a Dios ja'its tu tejhua'methanchab xe'. Ax im belal a Dios ja'its tu tejhua'methanchab in tsap a Dios tam ca caunanchat i lejquith cau axi pithnenec c'al a Dios in caulomejil a Dios, ani axi yab im belal a Dios yab ja ax tu tejhua'methanchab in tsap a Dios antsana'. **23** Lequitsq'ui ca otsits al an tamcunel ebchalab jita' yab exobchith ani yab belom c'al a Dios, ani hualam ne'ets quin ulu abal it olmanalchic max ti ats'al it cau hualim c'al pil i cahuinalab axi yab u exlanchab in ey an cau c'al an inic. **24** Ca otsits axi yab exobchith ani yab belom c'al a Dios tam tu cau i caulome c'al i lejquith cau pithach c'al a Dios, ani hualam ca tajc'anchat tin ichich ani quin tso'obna' abal pel i hualbith inic ani quin ats'a' tin ichich abal jolbithits c'al a Dios. **25** Quin lej exla' tim ba' ma tin luputh in tsinat tsalap. Taley quin tuthu in c'uualal ani quin c'ac'na' a Dios. Quin ulu abal lej chubax c'uajat a Dios c'al tata'chic al an tamcunel ebchalab.

An tequethtalab al an tamcunel ebchalab

26 Taley ebchalabchic, ca luba' ca t'aja' tequeth tam quit tamcun. Talchic ne'ets quin c'ac'na' a Dios c'al i ajatlab. Talchic quin exobchixnanchi in cahuinal a Dios. Talchic ne'ets quin olnanchi i cau jahua' pithnenequits c'al a Dios quin olnanchi. Talchic ne'ets ca cahuin c'al i pil cahuinalab ani talchic ne'ets quin lejquinchi jahua' u caunab. Antsana' patal jahuats ta ca t'aja' tit c'ac'naxchic c'al a Dios ca luba' ca tolminchi an ebchalabchic quin más bela' ani quin más tsapna' a Dios. **27** Expith tsab ox jats ca cahuin c'al i pil cahuinalab, ani tiq'uele ca cahuin axi ne'ets quin lejquinchi an cau jahua' u caunab antsana'. **28** Yab ca cahuin ti al an tamcunel ax in huit'al ti cau c'al i pil cahuinalab max yab hua'ats jita' ti quin lejquinchi jahua' quin ulu. Quin cuete' tauna' tim ba' c'al nixe' xi cau ani jaye quin tauna' a Dios. **29** Aniye jaye expith tsab ox i caulome c'al a Dios jats ca cahuin, ani ax in ats'anchal quin lej tsalpanchi jant'o in ey in ulalchic an caulome. **30** Max quetel i ebchalab ani ca pithan i cau c'al a Dios, quin aychi quin olna' ma ta ca talits ti cau axi cahue. **31** Antsana' ti junchic ta ca olna' an cau ax ti pithal a Dios cum pel it caulome c'al a Dios ani axi q'ue'at an ebchalabchic quin ejtinchi ani más ca lubachmethanchat in ejattalchic. **32** Axi caulome c'al a Dios yab quin xija' tim ba' ca cahuin, tocat quin olna' i cau tam pel in q'uijil. **33** A

Dios yab in culbetnal max jant'o ca xamumul t'ajan al i tamcunel ebchalab, tocat in culbetnal max ca t'ajan lej alhua' ts'ejcacathits.

Tim patal xi q'ue'atchic tamcunel ebchalab in ujnam quin junax c'ac'na' a Dios lej alhua' ts'ejcacathits. ³⁴Yab ca cuete' caunanchixin i uxum ti al i tamcunel ebchalab cum yab pel in uchbil. Quim putu c'al axe' xi cau cum ja'its in uchbixtal a Dios. ³⁵Max i uxum in le' quin tso'obna' i cau quin ucha' in tomquil ca lejquinchat an cau tin q'uima', cum yab in tomnal i uxum ti cuete' caunanchix ti al an tamcunel ebchalab.

³⁶Ca lej t'aja'chic ti cuenta abal yab ja c'al tata'chic ti tujey in cahuintal a Dios, ani yab expith tata'chic ax it pithnenec i cau c'al a Dios. ³⁷Quin lej tso'obna'chic abal jahua' nan tu thuchanchal tata'chic ja'its in lej uchbixtal an Ajatic. Hualam max hua'ats talchic c'al tata'chic in tsalpayal abal lej c'atpich huit'om ti caulome c'al a Dios ani c'atpich co'onchab in ichich c'al an Espíritu Santo. ³⁸Jitats yab quin t'aja' ti cuenta axe' jahua' u thuchanchal yab ca t'ajan ti cuenta c'al an ebchalabchic.

³⁹Taley ebchalabchic, ca lej luba' quit pithan a ey tit caulome c'al a Dios, ani yab ca c'anchi jita' ax in le' ti cau c'al i pil cahuintalab. ⁴⁰Ca lej t'aja'chic ti cuenta ca t'aja' patal tin tequeth ani tin lej aytal ti al an tamcunel ebchalab.

Ejtha a Cristo

15 Ebchalabchic, ca t'ilá' an alhua' cau axi nan tu

olchamal. Ja'its ax a bats'umalchic ani a junini' aynanchal. ²Ja'its c'al tit jec'onthabchic max ca lej junini' aynanchiye, i canats quit jalatmethanchat a belomtal.

³Pel i cau lej c'atpich in ey jahua' tim pitha' a Dios ani nan tu huat'banchichic tata'chic. Tu exobchamalchic abal tsemets a Cristo ti calchix c'al huahua' i hualab jant'iní' tin ulal ti al an T'ocat Thuchlab. ⁴Joliyat ani ti ox a q'uicha ejtha jant'iní' tin ulal an T'ocat Thuchlab. ⁵Tam ti ejthachits, tam ti tejhua'mejits c'al a Pedro ani talbel jaye c'al axi lajuj tsab i abathualechic tamcuthits. ⁶Ani talbel tejhua'me c'al bo' i bo' inic i ebchalabchic tamcuthits jaye. Tsemetsits talchic jaja'chic nixe' ani hua'atschic axi ejate. ⁷Talbel tejhua'me jaye c'al a Jacobo ani c'al tim patal in abathualejilchic a Dios.

⁸Antsana' ti tejhua'menec a Cristo c'al patal nixe'chic ax tu uchalconchic, ani lej talbelits tam ti tejhua'me jaye c'al nana' cum lej talbelits tam tu bela'. ⁹Tim patal an abathualechic nan yab jant'o tin exbath, ma yab in tomnalac quim punuhuat tin abathuale cum ti jayq'ui' u lej otnanchamal im bichohuil a Dios. ¹⁰A Dios tim punu tin abathuale expith tin ebal in alhua' inical. Ani yab jalat tim punu, cum u lej c'atpich t'ojonchamal in t'ojlabil yab ejtil xi q'ue'at an abathualechic. Jahua' u bajumal cu t'aja' yab tu cuetemtal, expith cum a Dios tin lej tsaplilinchal u ichich c'al in alhua' inical. ¹¹Yab lej exbath jita' c'al tit olchame an alhua' cau

max c'al nana' o max c'al q'ue'at i abathualechic. Jahua' lej exbath jats it olchamejits an alhua' cau ani jats a belchamalchic.

Ne'ets ca ejtha an tsemelomchic

¹²I olnamalits abal ejthachits a Cristo, ani jale' hualam hua'ats jita'chic c'al tata' ax in ulal abal yab ne'ets ca ejtha an tsemelomchic. ¹³Max yab ne'ets ca ejtha an tsemelomchic, tam yab ejthachits a Cristo jaye. ¹⁴Ani max yab ejthachits a Cristo, tam jolatits an alhua' cau ax i olnal ani jolatits jaye abal a belamalchic. ¹⁵Max yab ejthachits a Cristo, tam pel u janamcau huahua' abal i olnamalits abal a Dios in ejthamalits. Max yab chubax ne'ets ca ejtha an tsemelomchic c'al a Dios, tam yab chubax ejthamejits a Cristo c'al a Dios. ¹⁶Yab chubax ejthachits a Cristo max yab ne'ets ca ejtha an tsemelomchic. ¹⁷Ani max yab chubax ejthachits a Cristo, jolat abal a belchamal an alhua' cau ani yab it paculanchithits a hualab. ¹⁸Max yab chubax ejthachits a Cristo, tam t'ajat q'uibenequits ax im belamal a Cristo ani xohue' tsemene. ¹⁹Lej ts'ejhuantal huahua' tu c'ambihuale max expith teje' tsabal tu lablinchal a Cristo ani yab talbelaquits tam cu tsemets cu lablinchat jaye ti eb.

²⁰Lej chubax a Dios in ejtha' a Cristo ti al an jolimtalab, ani ja'its jaja' axi c'a'al ejthame c'al patal an tsemelomchic axi taye talbel ne'ets ca ejtha. ²¹Tin ebal juncats i inic jats ti ts'i'quin an tsemela, ani jaye tin ebal juncats i inic jats ti

ne'ets ca ejtha an inicchic. ²²Cum patal an inicchic pel in juntal a Adán jats tu tsemel. Ani patal axi pel in c'al a Cristo ne'ets ca ejtha. ²³Ne'ets ca ejtha jant'inits ti bijchith ca ejthachic. Oc'ox ejtha a Cristo, ani talbelaquits ca huichiy jaja' ne'ets ca ejthanchat jaye axi pel in c'al jaja'. ²⁴Ne'ets ca taley an q'uij q'uicha tam a Cristo quin talabthanchi in ey patal axi abatnomchic ani axi oc'leccic ani ax u eyalchic teje' tsabal. Tiq'uele ne'ets quim binanchi patal an abatnaxtalab tin c'ubac in Tata Dios abal jaja' ca jilc'on ti lej Ts'ale. ²⁵Biyat xohue' a Dios im bijiyamalits a Cristo quin t'aja' ti lej Ts'ale teje' tsabal. Ca jilc'on ti lej Ts'ale ma tam ta ca tala' atanthanchatis c'al a Dios tim patal axi tomolnax c'al a Cristo. ²⁶An tatalab tomolnax axi ne'ets ca talabetha jats an tsemla. ²⁷In ulal an T'ocat Thuchlab abal a Dios im punumalits a Cristo ti lej Abatnom c'al patal jant'o hua'ats ani jita' hua'ats. Abal in ulal patal, yab in le' quin ulu max ne'ets ca abatna a Dios c'al a Cristo, cum jats a Dios ax im punumalits a Cristo ti Abatnom. ²⁸Tam ti a Cristo quim bajuhuits quin tala' abatna' patal jant'o hua'ats ani jita' hua'ats, tamna' jaja' tin lej Tsacamil a Dios ne'ets quim bina' tim ba' ca abatna c'al in Tata c'al ti punuhuat ti Abatnom. Antsana' a Dios ne'ets ca jilc'on ti lej c'athpich pulic Abatnom c'al patal.

²⁹Ca t'aja'chic ti cuenta jaye abal hua'ats jita'chic ax u pujnal tin cuenta axi tsemenecchic. Jolat ca

pujan antsana' max yab ne'ets ca ejtha an tsemelomchic.

³⁰Max yab ne'ets cu ejtha, jolat qui cuxuy i yajchictalab ax i ets'ey yajchicnal teje' tsabal. ³¹Patal a q'uch'a c'unatits an tsembla tin cua'al cum hua'ats jita'chic ax in le' tiquin tsemtha'. Aba ani' antsana'its ebchalabchic, bel in lej culbel cum a belalchic i Ajatic Jesucristo. ³²Tam tin c'uajatac ti Efeso tin olnom c'al an alhua' cau tin yajchiquiy i pathay inicchic in ey ejtil max pel i tse' acan lej thimalon. Jolat u yajchicnamal antsana' max yab quin ejtha talbel tam in tsemenequaquits. Max chubax yab u ejthab an tsemelomchic, tam jun t'ajat qui t'ajchiquiy'ui jant'ini' u uluhuab c'al talchic i inic, cu c'apuplatsq'ui ani cu uts'uts'latsq'ui cum hualam cu tsemetsq'ui calam ani ja'its expithcua'.

³³Yab ca hualca' ta ba'chic quit c'ambinchat a tsalap. Ca t'ila' jahua' u uluhuab abal max ca ts'at'ey i alhua' inic c'al i pojcax inic ne'ets ca ts'ilc'oyat c'al im pojcaxtalcua'. ³⁴Ca junini' co'oy a tsalap ts'ejcacathits ani yab quit hualbinchic. Hua'ats jita'chic c'al tata' axi yab in tequeth exlanchal in ey a Dios, ani jatschic ca tithebethanchat in ichich c'al axe' xi thuchath u.

Jant'ini' hualam in inictal axi ejthachits

³⁵Hualam max hua'ats jita' ne'ets quin conoy jant'ini' ti ne'ets ca ejtha an tsemelomchic ani jant'othats in iniquith inictal ne'ets quin co'oy. ³⁶Yab lej tsalpath jitats quin

conoy antsana'. Ca t'aja' ti cuenta i iyab axi ca t'ayan in yejenchal ca joliyat ejtil max tsemenequits ani talbel ca cale tin acan. ³⁷Ca t'ayan jahuaquits tam iyab axi in acan ax u calel yab ejtil an iyab axi t'aynenec. Max ca t'ayan i iyab lab em, ca calejits ani in iniquith in acan pil tu tejhua'mel. ³⁸A Dios im pithal in acan nixe' xi iyab jant'ini' jaja' quin le'na'. Max pil an iyab pil jaye in acan. ³⁹Jahua' in cua'al in inictal teje' tsabal yab jununul in cua'al in iniquith. Junits in inictal an inic ani junits in inictal an co'nel. Junits in inictal an ts'itsin ani junits in inictal an to'ol. ⁴⁰Hua'ats ax in cua'al in inictal abal ca c'uajiy tsabal ani hua'ats ax in cua'al in inictal abal ca c'uajiy ti eb. Junits in alabental axi ti eb ani junits in alabental axi ti tsabal. ⁴¹Junits in maq'uiq'uiltyal a q'uch'a ani junits in maq'uiq'uiltyal a its'. Junits jaye in maq'uiq'uiltyal a otchic ani pil ti junchic in tsap in maq'uiq'uiltyal. ⁴²Antsana' jaye junits i inictal tam cu tsemets ani junits i inictal qui co'oy tam cu ejtha. Ca joliyat i inictal tam cu tsemets ani u c'atsel, ani ne'ets cu ejtha c'al i it inictal talbel axi ni jayq'ui' yab ne'ets ca tsemets. ⁴³Ca joliyat i ts'ejhuantal inictal, ani cu ejtha c'al i ts'alat inictal. Ca joliyat i bilom inictal ani cu ejtha c'al i inictal axi ne'ets ca lej tsaplilin abal ets'ey. ⁴⁴I inictal axi ca joliyat pel ja i anam t'u'lec. Jats ja c'al tucu xe'tsin teje' tsabal. I it inictal tam cu ejthajits jats ja c'al tucu lejat xe'tsin ti eb. Max a Dios tu pithal i anam t'u'ul abal cu xe'tsin teje'

tsabal anije jaye ne'ets tucu pitha' i inictal in ey abal cu xe'tsin ti eb.

⁴⁵ In ulal an T'ocat Thuchlab abal an oc'ox inic Adán ja ts'ejca ani ejatliyat. A Cristo ax u exlab ti taltalab Adán ja'its jaja' ax tu it ejatliyal abal ets'ey. ⁴⁶ Oc'ox tu pithal a Dios i inictal axi teje' tsabal ani ma talbelaquits ne'ets tucu pitha' i inictal in ey abal cu c'uajiy ti eb. ⁴⁷ An oc'ox inic ja ts'ejca c'al i pojoth ani an Ajatic ax u exlab ti tsabchilab inic ja'its jaja' axi tal ti eb. ⁴⁸ Abal ca c'uajiy teje' tsabal patal an inicchic in cua'al in inictal ejtil in inictal an oc'ox inic Adán. Axi ne'ets ca c'uajiy ti eb ne'ets ca pithan in inictal ejtil in inictal an Ajatic axi tal ti eb. ⁴⁹ Xohue' i eyits ejtil in ey a Adán axi ts'ejca c'al i pojoth, ani ma talbelaquits ne'ets cu pithan i inictal axi ejtil in inictal an Ajatic axi tal ti eb.

⁵⁰ Nan tu uchal ebchalabchic, yab ne'ets qui ejtou cu otsits ti eb jun tin t'ajal a Dios ti lej Ts'ale c'al i inictal axi teje' tsabal anam t'u'leclith ani xits'lith. Pel in ey i inictal teje' tsabal u talelom ani axi ne'ets cu pithan ti eb ne'ets ca ohuey abal ets'ey. ⁵¹ Nan u le' tu tso'oblinchichic jun i tsinat cau. Aba ani' yab patal huahua' ne'ets cu tsemets, bel patal huahua' ne'ets cu jalc'unchat cu pithan i it inictal. ⁵² Jun c'uathich i hual ne'ets cu jalc'unchat. Tam ca ats'an in taltal cahuith an trompeta ne'ets ca ejtha an tsemelomchic ani ca pithan in it inictal axi ni jayq'ui' yab ne'ets ca tsemets. Huahua' jaye ax u ejate ani i belal a Cristo ne'ets cu jalc'unchat i inictal. ⁵³ Abal qui ejtou cu c'uajiy

ti eb i yejenchal cu jalc'unchat i inictal ax u talelom ani cu pithan in ey ax u ohuel abal ets'ey. Cu jalc'unchat i inictal ax u tsemel ani cu pithan in ey axi ni jayq'ui' yab u tsemel. ⁵⁴ Cu pithanits i inictal ax u ohuel abal ets'ey ani yab u tsemel, yabats ne'ets tucu ata' an tsemela. Tam ojni' ne'ets ca putun jahua' in ulal an T'ocat Thuchlab abal ne'ets ca jum putat paclunchatits in tsap an tsemela. ⁵⁵ An tsemela yabats ne'ets quin co'oy in tsap abal tucu c'olchiye i inictal. Yabats ne'ets quin ejtou tucu ataye ni abal jayac. ⁵⁶ Cum hua'ats i hualabtalab teje' tsabal jats c'al tin cua'al in tsap an tsemela tucu c'olo, ani cum hua'ats an ts'ejcath cau jats c'al tin cua'al in tsap an hualabtalab tucu jolbiy. ⁵⁷ Qui bina' i c'ac'namal yan c'al a Dios cum i Ajatic Jesucristo tu atanthanchamalits an hualabtalab ani an tsemela.

⁵⁸ Jaxtam c'an ebchalabchic, ca lej junini' co'oy a ichich c'al an Ajatic mo'cathits ani yab quit jalc'u'inchic. Ets'ey quit puhuehuel t'ojon c'al an Ajatic, cum a tso'obits abal yab jolat max it junax t'oijnal c'al jaja'.

An ts'ejhualith tumin axi ca pithan
an ts'ejhuantal ebchalabchic

16 Nan ne'ets tu ucha'chic i cau tin cuenta an tumin axi ne'ets ca tamcuy abal ca huat'banchi an ts'ejhuantal ebchalabchic. Jant'ini' tu uchbiyamalits quin t'aja' an tamcunel ebchalabchic tihua' ti Galacia, antsana'techic ta ca t'aja'. ² Ti c'a'al q'uicha semana ta junchictal ca bina' an tumin

jant'init a Dios ti pitha' ca ata'. Ca co'onchi tamcuthits abal yab ca yejenchi ca tamcuy tam nan quin ulits. ³Jitats tata'chic ca tacuy tam quin ulits c'al tata'chic, jats ne'ets cu aba'chic quin nenchí an tumín an ebchalabchic tihua' ti Jerusalén c'al i thuchath u. ⁴Max in tomnal quin c'alene, tam ne'ets quin c'ale junax c'al jaja'chic.

Ne'ets ti tsa'bix a Pablo

⁵Ne'ets quin huat'ey tsa'bibil ti Macedonia ani talbel ne'ets tu tsa'biy tata'chic ti Corinto. ⁶Hualam quin jilc'on c'al tata'chic ma ta ca huat'eyits an tsamay q'uij. Taley talbel tata'chic tiquin tolmiy abal quin c'ale cu tsa'biy pil i cuenchalab. ⁷Yab u le' quin c'ale tu tsa'biy chic xohue'q'ui, cum yab ne'ets cu ejtou quin ohuey. Ma talbelaquits quin c'ale ani quin ohuey max pel in culbetan an Ajatic. ⁸Ne'ets quin jilc'on teje' ti Efeso ma tam quim bajuhuits an ajib Pentecostés. ⁹An Ajatic tin japchamal i hui'leb teje' abal quin otsits cu olna' an alhua' cau, ani u aychal yantalam i inicchic quim baju quim belchi. Aba ani', bel hua'ats yan axi tomolnax c'al in t'ojalibl an Ajatic.

¹⁰Max ca ulits a Timoteo c'al tata'chic ca lej alhua' bats'u c'al i ja'ubnaxtalab, cum pel in t'ojalil an Ajatic jant'ini' nana'ne pel tin t'ojalil an Ajatic. ¹¹Jaxtam ni jita' tata'chic yab ca ou tsu'u. Ca tolminchi c'al in ichich ca huichiy canat c'al nana'. Ne'ets cu aychi teje' ca ulits junax c'al q'ue'atchic i ebchalab.

¹²U lej uluth ucha' an ebchalab Apolos abal ca c'ale junax c'al q'ue'at i ebchalabchic abal ti tsa'biy chic. Xohue' yab in le' ca c'ale, ma tam in tomnalaquits tam ne'ets ca c'ale.

An tsapnethomtalab

¹³Quit c'uajiythic ts'ejcacath a ichich max jant'oquitsq'ui quit t'ajchin ani ca lej junini' bela' an Ajatic. Jaja' ti lej tsaplilinchichic a ichich ani c'al ni jant'o yab quit jiq'uey. ¹⁴Patal jahuaquitsq'ui ca t'aja'chic c'al i lej c'anithomtalab ta ichich.

¹⁵Ebchalabchic, a tso'obchic abal axi c'ujatchic tin q'uima' a Estéfanas jats ax in c'a'al belamal an alhua' cau ti Acaya. C'al patal in canat in lej binamalits tim ba' jaja'chic quin tolminchi an ebchalabchic c'al a Cristo. ¹⁶Nan u lej le' abal ca lej t'aja'chic jahua' jaja'chic ti uchal ani jaye jahua' quit uchan c'al axi q'ue'atchic tim patal axi tolmix ani ax u t'oinal c'al an Ajatic. ¹⁷In culbel cum ultsits c'al nana' a Estéfanas ani a Fortunato ani a Acaico. Jaja'chic tin tolminchi c'al jahua' tata'chic yab a ejtou tiquin tolminchi cum yab it c'uajat teje'. ¹⁸Jaja'chic tin culbethanchamalits u ichich jant'ini' ti culbethanchamalitstechic a ichich. Ca lej c'ac'na'chic cum pel i lej eyath ebchalab c'al a Cristo.

¹⁹An tamcunelchic ebchalab ti bichoulom Asia ti tsapnethal tata'chic. Aquila ani a Priscila ti tsapnethalchic tim bij an Ajatic, ani jaye ti tsapnethalchic an ebchalabchic ax u tamcunal tin q'uima'. ²⁰Tim

patal an ebchalabлом ti lej abchal i tsapnethomtalab. Quit tsapnetháxin c'al i t'ocat c'anithomtalab.

21 Nana' im Pablo tu abchal axe' xi tsapnethomtalab axi pel u cuete' thuchbil.

22 Ne'ets ca t'ajat q'uibey jitats yab ichich hual tsu'ux c'al an Ajatic

Jesucristo. U lej le' max ca thubat huichiy an Ajatic.

23 Biyat u lej le' abal ti lej lubach co'onchi a ichich an Ajatic Jesucristo c'al in alhua' inictal.

24 Nan tu abchal ta patalchic i c'anithomtalab tim bij a Cristo Jesús. Amén.